

JNIÑU QUIJI JEE NI JITO NDIJIN SAN JUAN

Jeē ni stéén Jesucristo
tācá jniñu quiji

1 Jnūhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñáyuu cácanđíje jeē cácuu i mozo yā. Te stéén yā nuū i tācá jniñu jeē yachī coo. Te ni tají yá ndajéhé yā ni quiji ya ni steén ndijin yā jniñu un núu ruhū Juan jeē cúu ri mozo yā. ²Te máá rí cástūhun ndāā rī siquī tāca jēē ní jito ri ún, te nácani ndāā rī jnūhun Yaā Dios jíin jnúhun jeē ní cahān ndāā Jesucristo.

³Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeē cáhu ñayuu tāca jnúhun yáha jeē ní cachi Yaā Dios, te chuhun ni i. Chi je cuacuyajni quivī coo tācá jniñu yósó núu tútu yáha.

Jeē tée Juan carta nuū ndihúxá
grupo ñayuu cácanđíje

⁴Máá rí cúu Juan, te tée ri jnūhun yáha cuájeē nuū rohó, ndihúxá grupo ñayuu cácanđíje jeē cáyūcu Asia. Te ñúhun ni rī jeē máá Yaā Dios na sáha ga yā jeē váha róhó

jíjnáhan ró, te sáha ya jeē coo ndeyí coo siī ni rō. Chi máá yá cúu Yaā iyó vijna, te ni iyo ya níí cáni, te coo ya níí cáni. Te ñúhun ni rī jeē suni súcuan sáha ndihúxá Espíritu jeē cáhiin ya yuhu mesa nuū ndácu Yaā Dios jniñu. ⁵Te ñúhun ni rī jeē suni súcuan sáha Jesucristo, Yaā cahán ndāā tāca jnúhun. Te xīhna gā maá yá ni natecu mēhñu ndíyí. Te cújéhnu ya nuū tāca rey jeē iyó ñayiví. Te máá yá cúndáhú ni yā yohó, te ni nacate ya yohó núu cuéchi yó jíin níñī yā. ⁶Te ni sáha ya jeē ní nduu yó rey jíin sūtū cájejníñu nuū Tatá yā Yaā Dios. Te na cáhán yō jeē yóhyo luu cújéhnu ya te jníí ya poder níí cáni. Amén.

⁷Cuni sōho jíjnáhan ró, chi ndiji Cristo jíin vícō. Te ndíiví ñayuu coto i nuū yā, te nde jíin ñayuu jeē ní castújí i ya. Te tāca raza ñayuu níí cáhnu ñayiví ndahyū i jeē tu ní cácanđíje i ya. Súcuan nahín coo.

⁸Suhva cáhán maá Jítoho yō, Yaā jníí ndíhi poder: Máá rí cúu nájñūhun letra A xīhna ñúhún jíin letra Z jeē sándíhí na, chi máá rí níí squeejéé ndíhi te máá rí sínu, áchí máá Yaā iyó vijna, te ni iyo ya níí cáni, te coo ya níí cáni.

**Jeē ní jito Juan jeē
cujéhnú luu Cristo**

⁹Maáa rí cúu hermano rō Juan jijnáhan ró. Te inuú-ni ndóho ri jnūndóho jíin ró siquī jeē cácanđíje yó Jesucristo, te inuú-ni ndácu Yaā Dios jniñu nuū yō, te inuú-ni jéndeýí ni yō sáha Jesucristo. Te siquī jeē ní nacani ri jnūhun Yaā Dios jíin jéē ní cachi ndaā ri jnūhun Jesucristo, jeē yúcuan ní cajñi i ruhū cuenta preso, te ni cachune i ruhū isla jeē naní Patmos. ¹⁰Te ñin domingo ni jito ndijin rī jeē ni stéén maá Espíritu Santo nuū rī. Te ni jini sōho ri ñin jeē cána jee niñin ichi yátá rī nájnūhun jeē tívi trompeta.

¹¹Te ni cahān jíin rí:

Maáa rí cúu nájnūhun letra A xihna ñúhún jíin letra Z jeē sándñí na, chi máa rí cúu Yaā iyó ndé xihna ñúhún te coo ri ñí cáni. Te na téē ró núú ñin tutu táca jéē cóto ró, te tají ró quihñ nuū ndihúxá grupo ñayuu cácanđíje jeē cáyūcú i ñí cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

¹²Yūcuán na te ni ndicó cóto ri jeē cóto ri ndé ñin cúu jeē cahān jíin rí. Te ná ni ndicó cóto ri te ni jito ri uxā candelero oro. ¹³Te mēhñú ndihúxá candelero un índichi maá Yaā ní nduu tēē. Te ñúhun ya ñin sahma cáni jeē jinú nde nuū jehé yā. Te núhñi ñin cinturón oro jicá yā.

¹⁴Te ixi xíní yā chi yaa nájnūhun ixi lánchi, nájnūhun yuhvā volcán. Te tinūu ya ndíndēē nájnūhun yáñuhñ. ¹⁵Te jehé yā xínú jito nájnūhun cāa cuaán jéē ni ndúhvā

nuū horno. Te níhñin ndasí cáhán yā, nájnūhun níhñin cuehē yūte náhnu. ¹⁶Te ndaváha ya jñí ya uxā quími. Te yuhu ya quénda jeē cáa nájnūhun espada jeē xeén ndíndúú lado, te suu cúu jnūhun ya jeē niní sándaā yā siquī cuéchi. Te nuū yā cáa nájnūhun niándii jeē nándii ndaxín.

¹⁷Te ná ni jito ri yā te ni cotúú rí nuū jéhé yā nájnūhun jeē ni jíhñi rī. Te ni soó yā ndaváha ya siquī rī, te ni cahān yā:

Ma yūhu ró. Maáa rí cúu Yaā iyó ndé xihna ñúhún te coo ri ñí cáni. ¹⁸Te Yaā técu cúu ri. Chi ni jíhñi rī te ni natecu rī, te vijna chi técu rī ñí cáni. Te máa rí jñí poder siquī cuéhyí jéhñi ñayuu jíin síquī lugar nuū cáyūcu ánuá ndíyí. ¹⁹Núu súcuan te tee ró núú tútu táca jéē ní jito ró, jeē cúu vijna jíin jéē cóo ichi núú. ²⁰Te yāha cúu jnūhun sáhi síquī ndihúxá quími ni jito ró jñí ndaváha ri, jíin síquī ndihúxá candelero oro. Ndhúxá quími ún cúu nájnūhun ndihúxá jeē cácujeñnu nuū ndihúxá grupo ñayuu cácanđíje. Te ndihúxá candelero cúu nájnūhun ndihúxá grupo ñayuu cácanđíje.

**Jnūhun cuahān nuū ndihúxá
grupo ñayuu cacandíje:**

Jnūhun cuahān ñuu Efeso

2 Tee ró jnūhun yáha na quíhñ nuū jeē cujeñnu nuū ñayuu cácanđíje ñuu Efeso: Súcuan cáhán ruhū, Yaā jeē jñí ndihúxá quími jíin ndaváha ri, te jíca cuu ri mēhñú ndihúxá candelero oro. ²Je jíin rī táca jniñu váha cásáha ró, jeē

cándihvī ni rō siquī jnúhun ri, jíin jéē cajendeyí ni rō. Te jíin rī jeē tu cájēhe ró jnúhun quivicoo ñayuu casáha néé méhñu ró. Te jíin rī jeē ní cajito ndee rō tēe cástáhú jeē cácahān de jeē cúu de apóstol, te ni cajini rō jeē tēe stáhú cácuu de. ³Te ni cajendeyí ni rō ni candoho ró jnúndóho, te tu ní ndínuu ni rō jeē cácuu ndasí ró jíin jniñu ri. ⁴Te vēsú súcuan te íyó jecu jeē cahán ri nuū rō, chi tuá cáhiyo manī vāha ró jíin rī nájnūhun ni íyo manī rō jíin rī quivī jehé. ⁵Núu súcuan te nucūhun ni rō ndese ni castóo ró jnúhun jeē ni íyo manī rō jíin rī, te nacani ni rō, te na sáha ró nájnūhun ni casáha ró ndé quivī ún. Te núu ma nácani ni rō, te yachī jeē rī te stáa ri candelero rō nuū ín, cúu jeē ma cuññi ga rō jíin ñayuu cácaandíje. ⁶Te vēsú súcuan te íyó ñin jeē váha casáha ró, chi tu cánujnahān cuítī ni rō cájito ró jniñu néé casáha ñayuu cándiquin jnúhun jeē steén Nicolás. Te suni máá rī tu nújnahān cuítī ni rī jito ri. ⁷Ñayuu iyó sóho na chúsóhó i jeē cahán maá Espíritu Santo jíin táca grupo ñayuu cácaandíje. Táca ñayuu jeē cúndeyí síquī jeneé, cuāha ri jnúhun caji i ndehē jeē cúun xini yújnu jeē sáha jeē cótecu i ní cání. Te yujnu un ín nuū jardín Yaā Dios nde andiví, áchí yá.

Jnúhun cuahān ñuu Esmirna

⁸Te tee ró jnúhun yáha na quíhín nuū jeē cujéhnu nuū ñayuu cácaandíje ñuu Esmirna: Súcuan cáhān ruhū, Yaā jeē iyó ndé xihna ñúhún te coo ri ní cání, te ni jihī rī te ni natecu ri. ⁹Je jíin rī táca

jniñu váha casáha ró, jíin jnúndóho cándoho ró, jíin jéē cándoho ndáhú ró. Te vēsú súcuan te cúca ró ndihī jeē ndíso jnúhun ri. Te jíin rī jeē cácahān neé ñayuu siquī rō jijnáhan ró. Ñayuu un cácahān i jeē ñayuu hebreo, ñayuu maá Yaā Dios cácuu i, te tuú chi cástáhú-ni i, chi sa ñayuu yíhi ndaha Satanás cácuu i. ¹⁰Te ma yúhú cuítī rō táca jéē ndoho ró. Chi jexeén je yajni sáha jeē quivicoo sava ró vecāa jeē cóto ndee rohó jijnáhan ró, te ndoho ró jnúndóho uxī quivī. Te na cuññi nihin ró ndé cuu rō, te cuāha ri premio jeē cótecu rō ní cání. ¹¹Ñayuu iyó sóho na chúsóhó i jeē cahán maá Espíritu Santo jíin táca grupo ñayuu cácaandíje. Táca ñayuu jeē cúndeyí síquī jeneé, ma nihín i jnúndóho jeē jnahnú ndetū i cuu i vuelta uū, achí yá.

Jnúhun cuahān ñuu Pérgamo

¹²Te tee ró jnúhun yáha na quíhín nuū jeē cujéhnu nuū ñayuu cácaandíje ñuu Pérgamo: Súcuan cáhān ruhū, Yaā jeē névāha espada jeē xeén ndíndúú lado, te suu cúu jnúhun ri jeē sándaā rī siquī cuéchi. ¹³Je jíin rī táca jniñu váha casáha ró, te jíin rī jeē cáyūcu ró méhñu ñayuu jeē ndácu Satanás jniñu nuū. Te vēsú súcuan te cáhiin nihin ró jíin jnúhun ri, te tu ní cányūhu ró jeē cácaandíje ró rúhū, ni quivī ni jihī Antipas, tēe ni squícu vāha ni nacani ndaā jnúhun ri. Chi ñuu rō cáyūcu ñayuu cácejniñu nuū Satanás, te ni cajehni i Antipas. ¹⁴Te vēsú súcuan te íyó jecu jeē cahán rī nuū rō jijnáhan ró. Chi méhñu róhó ñayuu ñuu Pérgamo

iyó sava ñayuu cándiquin jnūhun ni steén Balaam. Chi tēe un ní steén de nuū Balac ndese squívi de ñayuu Israel cuēchi jeē cáji i jeē ni sócō nuū ídolo jíin jēē cosíquí ndēē jnáhan i. ¹⁵Te suni íyó sava ñayuu mēhñu ró jeē cáchandíje ga i jnūhun ni steén Nicolás, te jnūhun ún chi tu núnahan cuiti ni rī. ¹⁶Núu súcuan te nacani ni rō siquī cuéchi ró. Chi núu tuú te yachi jeē rī jíin espada jeē quénda yuhu rī, te suu cúu jnūhun ri jeē sándaā rī siquī cuéchi. Te jíin yúcuan te stóho ri ñayuu jeē candíje ga jnūhun néé un. ¹⁷Ñayuu iyó sóho na chúsóhó i jnūhun jeē cahán maá Espiritu Santo jíin táca grupo ñayuu cáchandíje. Táca ñayuu jeē cúndeyí síquī jeneé, scáji rī i maná jeē yísahí ichi ándiví. Te suni cuāha ri ñin yuū cuijín núu i, te nuū ún condee ñin síhvi jéé, te ni ñin ñayuu ma cúní síhvi un, chi máá-ni i jeē nihín. Achí yá.

Jnūhun cuahān ñuu Tiatira

¹⁸Te tee ró jnúhun yáha na quíhín nuū jeē cujéhnu nuū ñayuu cáchandíje ñuu Tiatira: Súcuan cáhán ruhū, maá Séhe Yaā Dios jeē ndíndēe tñūu rí nájñūhun yáñuhūn. Te jehē rī xínú jíto nájñūhun cāa cuaán jēé ni ndúhvā. ¹⁹Je jíin rī táca jniñu váha cásáha ró, chi cákundáhú ni rō jnáhan ró, te cáchandíje ñihin ró rúhū, te cájejniñu ró núu rī, te cájendeyí ni rō. Te jíin rī jeē vihyá gā cásáha ró vijna vēsú nde quiví jehé. ²⁰Te vēsú súcuan te íyó jecu jeē cahán rī nuū rō. Chi íyó ñin ñahan mēhñu ró jēé naní Jezabel, te cájēhe ró

jnūhun stéén ña nuū rō. Te áchí ña jeē nácani ña jnūhun Yaā Dios. Te tuú chi jíin jnúhun stéén ña te stáhú ña ñayuu cáchandíje jeē cácuu i mozo rī. Te sáha ña jeē casíquí ndēē jnáhan i, jíin jēé cáyeji i jeē ni sócō nuū ídolo. ²¹Te ni jēhe ri tiempo jeē na nácani ni ña, te tu cúní ña nacani ni ña stóo ña jeē casíquí ndēē ña. ²²Núu súcuan te na sáha ri jeē jécava ña jíin cuéhyī. Te táca ñayuu casíquí ndēé jíin ña, suni cuāha ri jnūndóho xeēn nuū i, te núu ma nácani ni i stóo i jniñu néé nájñūhun sáha ña. ²³Te sáha ri jeē cúu ñayuu jeē ni scándíje ña. Te súcuan cuni táca grupo ñayuu cáchandíje jeē maá rí cúu Yaā jiní ndihí ndese cāa jeē níjnūnín jíin ánuá ñayuu. Te cuāha ri yāhu ñin ñin ró núu ndese ni casáha ró. ²⁴Te sava ga rō jeē cáyucú ñuu Tiatira, jeē tu ní cájetáhú jnūhun stéén ñahan ún, ni tu ní cájniñi ró jnúhun jeē cácahān i jeē jnūhun sáhi gá Satanás cúu, jíin máá ró cahán rī jeē ma tēe ga rī inga jniñu siquī rō. ²⁵Chi máá-ni jeē na quéndōo ñihin ró jíin jnúhun ndaā cáchandíje ró, te quendōo ñihin ró jíin ndé quiví ndíji ri. ²⁶Táca ñayuu jeē cúndeyí síquī jeneé, jíin jēé squícu vāha jniñu cúní rī nde vijna te nde quiví sándihí, sáha ri jeē cujéhnu i ndacu i jniñu nuū táca nación, ²⁷nájñūhun ni sáha Tátá rī jeē cujéhnu ri ndacu ri jniñu. Te ndacu ñihin i jniñu nuū táca nación. Te nájñūhun cúun yúú i quísi tahu, súcuan squéhichi i ñayuu tu cájendetū nuū ri. ²⁸Te sáha ri jeē coto i ruhū jeē luu cujéhnu ri quenda ndijin rī, nájñūhun jíto i lucero jeē cáne cúndijin. ²⁹Ñayuu

iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácanđije. Achí yá.

Jnūhun cuahān ñuu Sardis

3 Te tee ró jnūhun yáha na quíhín nuū jeē cujéhnū nuū ñayuu cácanđije ñuu Sardis: Súcuan cáhán ruhū, maá Yaā jeē névāha ndihúxá Espíritu Yaā Dios jíin ndihúxá quīmi. Je jíin rī tācá jniñū cásáha ró, te cácahān ñayuu jeē cátecu rō, te nuū rī chi nájñūhun ndīyī cácuu ró. ²Na nátaḥū ni rō, te ndejéé níhin ró jíin jniñū jeē jecu na iyó te ndúcú naa. Chi je jíin rī jeē tu squícu vāha vāha ró núū Yaā Dios. ³Te na núcūhun ni rō tāca jnūhun jeē ní castéén nuū rō. Te cuatáhú ró jnūhun ún te nacani ni rō siquī cuéchi ró. Chi núu tú natahū ni rō, te cuajeē rī nuū rō ñin sanaa-ni nájñūhun jeē ñin sanaa-ni te quíji ñacuīhná, te ma cúni rō na hora jinū rī nuū rō. ⁴Te vēsú súcuan te íyó nahín jecu rō ñuu Sardis jeē tu ní cásáha ró cuéchi, jeē cúu nájñūhun jeē tu ní sájnehén ró sahma ró. Jeē yúcuan cuíjín yaa coo sahma ró caca ró jíin rí, chi ñayuu vāha cácuu ró. ⁵Chi tāca ñayuu jeē cúndeyí síquī jeneé, cuāha ri sahma cuijín yaa cuhun i. Te ma ndáhva rī síhví i nuū libro jeē yosó síhví ñayuu cotecu ní cání. Te cuajnúhún rí i nuū Tatá rí jíin núū tācá ndajéhé yā. ⁶Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácanđije. Achí yá.

Jnūhun cuahān ñuu Filadelfia

⁷Te tee ró jnūhun yáha na quíhín nuū jeē cujéhnū nuū ñayuu

cácanđije ñuu Filadelfia: Súcuan cáhán ruhū, Yaā ndoo Yaā ndaā, te névāha ri ndacáa rey David. Te máá rí núne jeē quívi ñayuu nuū ndácu ri jniñū, te ni ñin ma cúu casi, te máá rí jési, te ni ñin ma cúu nune. ⁸Je jíin rī tācá jniñū vāha cásáha ró. Te ni nune ri nájñūhun ñin yéhyí quívicoo ró, te ni ñin ma cúu casi. Chi vēsú jecu-ni fuerza rō iyó, te ni cacandíje ró jnūhun ri, te tu cájesi rō yuhu ró jéē cácanđije ró rúhū. ⁹Te íyó sava ñayuu yíhi ndaha Satanás, te cácahān i jeē ñayuu hebreo, jíin ñayuu maá Yaā Dios cácuu i, te tuú chi cástáhū-ni i. Núu súcuan te sáha ri jeē jécoco i nuū rō te jecuññí yití i nuū rō, te cuni i jeē maní rí jíin ró. ¹⁰Te vāha ni casquícu ró jnūhun ní cahān rī jeē cuándeyí ni rō. Te jeē yúcuan jnama ri rohó quíví jeē quíji ñin jnūndóho xeēn siquī ñayuu níí cáhnu ñayíví, jéé cóto ndee ún i jíjnāhan i. ¹¹Te yachí ndiji ri. Núu súcuan te quendōo níhin ró jíin jnūhun cácanđije ró, návāha ni ñin ma quénde premio rō. ¹²Tāca ñayuu jeē cúndeyí síquī jeneé, sáha ri jeē cuu i nájñūhun síhín yuū luu ini templo Yaā Dios maá rí. Te ma cújiyo i nuū ndeé yá un. Te tee ri síhví Yaā Dios maá rí jneé i, jíin síhví jéé máá rí, jíin síhví ñuu Yaā Dios maá rí. Te ñuu un cúu Jerusalén jeé, te cuun quiji ichi ándiví ndé nuū Yaā Dios maá rí. ¹³Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácanđije. Achí yá.

Jnūhun cuahān ñuu Laodicea

¹⁴Te tee ró jnūhun yáha na quíhín nuū jeē cujéhnū nuū ñayuu

cácandíje ñuu Laodicea: Súcuan cáhán ruhū, maá Yaā cúu jñūhun ndaā, Yaā cúu testigo vāha jeē cahán ndaā. Te máá rí ni sáha ndíhi jeē ni cáhán Yaā Dios jeē na jécōo. ¹⁵Je jíni rí tācá jniñu cásáha ró. Te cácuu ró nájñūhun jeē tú mījin ni tú jihní, cúu jeē jecu-ni cácandíje ró jñūhun ri, te ni tu cájito uhū rō ni tu cándihvī ni rō siquī. Te nacā jeē váha núu jeē mījin ró chí jéē jihní ró nuú. ¹⁶Te tuú chi máá yívixī-ni ró, chí ni tu cájito uhū rō ni tu cándihvī ni rō siquī. Te jeē yúcuan squéhichī rí rohó nájñūhun iin jeē tésīhi rí jeē séyūhu rí jeē tu núnahan ni rí. ¹⁷Te cácahán rō jeē cucá ró, te quéndōo vāha ró, te tu cúmanī ni iin nuū rō. Te tu cásáha ró cuenta jeē cuécá íi cándoho ró, te ndáhú ndasí ró, te cácuáá ró, te máá ñií líi rō. Te tāca jéē yáha cúní cahán jeē tu cácandíje vāha ró. ¹⁸Núu súcuan te cáhán rí jíin ró jeē nuū rí cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha ri jeē coo cúcá ndije ró ndíhi jeē ndíso jñūhun ri. Te nuū rí cuaan ró sahma cuijín cuhun ró, návāha tú cucanu rō jeē maá ñií líi rō, cúu jeē quéndōo ndaā rō sáha rí. Te cuaan ró tájnā nuū rí, quívi tinūu ró, návāha ndundijin tinūu ró, cúu jeē jecūhun ni rō jñūhun ri. ¹⁹Tāca ñayuu jeē cundáhú ni rí, chí cáhán rí nuū i te stóho ri i, návāha na chūhun ni i. Núu súcuan te na cóndihvī ni rō jijnáhan ró, te nacani ni rō jeē stóo ró cuéchi ró. ²⁰Cuni sōho, chí íin ri yehyí ánuá rō te cáhán rí. Te núu ndé-ni róhó cuni sōho te nune ró yéhyí ánuá rō, te quívi ri caji ri

staā jíin ró, te suni caji maá ró jíin rí. Te suu cúu jeē cóndee rí anuá rō. ²¹Tāca ñayuu jeē cúndeyí síquī jeneé, cuāha ri jñūhun conene i jíin rí nuū mesa nuū ndácu ri jniñu. Chi máá rí suni ni snāā rí poder jeneé, te ni cucōo ri jíin Tátá rí nuū mesa nuū ndácu ya jniñu. ²²Ñayuu iyó sóho na chúsóhó i jñūhun jeē cahán maá Espíritu Santo jíin táca grupo ñayuu cácandíje. Achí yá.

Tāca jéē cáyucú andiví cáchiñuhún nuū yā

4 Yūcuán na te ni ndacoto ri, te ni jito ri jeē núne iin yéhyí andiví, te máá Yaā jeē ni cáhán jíin rí jeē xíhna ñuhún, ni cahán tucu jíin rí nájñūhun jeē tívi trompeta. Te ni cahán:

Caa quiji ró yáha, te na stéén rí nuū rō tācá jniñu jeē cóo ichi núu gā, achí yá.

²Te máá Espíritu Santo ni scóto-ni ya ruhū. Te ni jito ri jeē andiví íin iin mesa nuū ndácu jniñu, te néne máá yá nuū mesa un. ³Te máá yá jeē néne yúcuan cáa ya nájñūhun ndíndéé iin yuū quiyi ndíi chí iin yuū cuehé ndíi. Te iin ticō vēhnde ní jicó ndúū yuhu mesa yā, te ndíndéé nájñūhun iin yuū cuíi ndíi. ⁴Te xiin mesa yā ni jito ri jeē ní jicó ndúū ocō cuūn gā mesa nuū ndácu jniñu. Te nuū mesa un néne ocō cuūn tēe jéhnū cándiso jniñu. Te cáñuhun de sahma cuijín yaa, te xinī de cáñuhun corona oro. ⁵Te nde nuū mesa nuū ndácu ya jniñu ndíndéé taja te nñhin te cáhán taja. Te ichi núu mesa yā íin ndíhuxá Espíritu Yaā Dios, jeē cáa nájñūhun uxā yiti náhnū jeē cayú ñuhūn.

⁶Te ichi núu mesa yā ún suni íyó nájñūhun iin mar jeē jíto quiyi nájñūhun vidrio.

Te xiin mesa yā un ní jicó ndúu cuūn jeē técu. Te íyó cuéhē tinūu níí cáhnu ichi núu jíin ichi yátá un.

⁷Te iin jeē técu un cáa nájñūhun ndicaha. Te inga cáa nájñūhun stiquī. Te jeē uní chi nées nuū tée. Te jeē cuún chi cáa nájñūhun yaha chócó jéē jicó núu tachí. ⁸Te ndicúun jeē técu un íyó ínū ndijēn jeē iin iin. Te máni máá tñūu cúu níí cáhnu nde jíin níí chíji ndijēn. Te nduú ñuú tu jécuiñī cuiti jeē cahán:

Yaā iī Yaā ndoo ndasí
cúu máá Jítoho yō Yaā Dios, Yaā
jníí ndihí poder,
Yaā iyó vijna, te ni íyo yá níí
cáni, te coo ya níí cáni.

Achí.

⁹Chi máni jeē cácahān ndicúun un jéē cujéhnu ndasí máá Yaā jeē néne nuū mesa, Yaā jeē técu níí cáni cuiti. Te yíñūhún cácahān un jíin yá, te nácuatáhú núu yā. ¹⁰Te tāca jínu jeē casáha súcuan, te ndihócó cuūn tēe jéhnu cándiso jnínū, cájecuiñī yití de nuū Yaā jeē técu níí cáni cuiti, cáchiñūhún de ya. Te cástáa de corona de, cájequin de ichi núu jehé mesa yā. Te cácahān de:

¹¹Jítoho ná te Yaā Dios na cúu ní.
Te vāha ndasí Yaā cúu ní jéē
cácahān i jeē luu cújéhnu ní,
te cáhiyo yíñūhún i nuū ní, te
jníí ní ndihí poder.
Chí máá ní ni sáha ndihí jeē iyó,
te siquī jeē súcuan ni cuu ni
máá ní te ni jecōo ndihí.

Achí de jíjnāhan de.

Jeē ní nune Londe Yaā Dios tutu

5 Yūcuán na te ni jito ri jeē Yaā néne mesa jeē ndácu jniñu, ndaváha ya jnín ya iin tutu cáni jeē ní tuu. Te yósó jnúhun ndíndúú lado tutu ún, te ndíhyú jíin úxā sello. ²Te ni jito ri iin ndajéhé yā jeē ndíso poder, te ni cahān jee:

¿Ndé iin cúu tēe vāha ndasí jeē cóndiso jniñu cahnde sello te nune tutu yáha? áchí ndajéhé yā.

³Te ni andíví ni ñayíví ni jeē iyó chíji ñayíví, tu ní íyo ni iin jeē cóndiso jniñu nune tutu ún, ni jeē cóto nuū. ⁴Te ni ndahyū ndasí rí, chí tu ní íyo ni iin jeē cóndiso jniñu nune te cahu tutu ún, ni jeē cóto nuū. ⁵Yūcuán na te ni cahān iin tēe jéhnu un jíin rí:

Ma ndahyú rō, chí íyó iin Yaā ndíso jniñu jeē cahnde yā ndihúxá sello ndihyú tutu, te nune ya. Te máá yá chí íyó cuéhē poder yā, nájñūhun jeē iyó cuéhē fuerza iin ndicaha. Te ni cacu ya chíji yucūn Judá, jeē cúu yucūn rey David. Te ni snāa yā poder tāca jéneé.

⁶Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un íin ya nuū íin mesa Yaā Dios, mēhñū ndicúun jeē técu, jíin tēe jéhnu cándiso jniñu. Te íyó úxā ndiqui jíin úxā tinūú Londe ún. Te tinūú un cúu ndihúxá Espiritu Yaā Dios jeē ní tají yá ni jengoo níí cáhnu ñayíví. ⁷Te Londe un ní jequihin ya tutu jeē jnín ndaváha Yaā jeē néne nuū mesa. ⁸Te ná ni quihin ya tutu ún, te ndicúun jeē técu jíin ndihócó cuūn tēe jéhnu cándiso jniñu, ni cajecuiñī yití núu yā. Te ná iin ná iin tēe

jéhnun un cándaha yaa jeē naní arpa, jíin cóhō cūu oro jeē nūhun chitú súje cutú. Te sūje cutú un cūu máá táca jnúhun jeē cájicān tahuñayuu yíhi ndaha Yaā Dios. ⁹Te ni cajita de iin yaa jeé, te suhva cáhán:

Vāha ndasí Yaā cūu ní jée
quihin ní tutu te cahnde ni
sello jeē ndihyú.

Chi ni cajehni i níhín, te jíin nñī
ni ní nacuaan níñayuu
mēhñu táca raza, táca yuhu,
tácá ñuu, táca nación, návāha
cūu i ñayuu Yaā Dios.

¹⁰Te ni sáha ní jée cuu i rey jíin
sútū nuū Yaā Dios,
te ndacu i jniñu ini ñayiví.

Achí de cájita de.

¹¹Te ni jito ga rī, te ni jini sōho ri
jeē cácahān cuehē ndajéhé yā jeē ní
cajicó ndūu xiin mesa yā, jíin xiin
ndicúun jeē técu, jíin xiin tēe jéhnun
cándiso jniñu. Te iyó cuehē ndasí
millón ndajéhé un. ¹²Te suhva ni
cacahān jee ya:

Vāha ndasí Yaā cūu Londe jeē ní
cajehni i.

Te jeē yúcuan jñí ya poder, te
yōhyo cúca yá,
te yōhyo ndíchí yá, te ndíso ya
cuehē fuerza,
te cáhiyo yíñuhún ndíhi nuū yā,
te luu cújéhnun ya,
te cácahān i jeē váha ndasí Yaā
cūu ya.

Achí.

¹³Te suni ni jini sōho ri jeē cácahān
ndíhi jeē ni sáha Yaā Dios jeē iyó ini
andiví jíin ini ñayiví jíin chíji ñayiví
jíin ini mar. Te ndívi un ní cacahān:

Cúsí ni yō cahán yō jeē yóhyo
vāha Yaā cūu máá Yaā néne
mesa nuū ndácu ya jniñu,

jíin Yaā cūu Londe Yaā Dios.
Te na cóo yíñuhún yó nuū yā,
chi cújéhnun luu ya,
te jñí ya poder ní cáni cuiti.

Achí.

¹⁴Te ni cacahān ndicúun jeē técu:
Súcuan na cóo, áchí.

Te ndíhócó cuñ tēe jéhnun
cándiso jniñu ni cajecuiñi yití de, te
ni cachiñuhún de nuū Yaā jeē técu
ní cáni cuiti.

Siquí ndíhuxá sello

6 Yūcuán na te ni jito ri jeē
Yaā cūu Londe Yaā Dios, ni
jehnde yā iin jeē uxá sello un. Te
ni jini sōho ri jeē cahán iin jnáhan
ndicúun jeē técu ún, nájñuhun
cahán taja:

Nehen te cuni rō.

²Te ni ndacoto ri, te ni jito ri iin
caballo cuijín. Te jeē yosó síquī tī
un ndáhá iin arco jeē stáva nduva.
Te ni jecūhun iin corona xinī. Te ni
quenda ni jejnáhan, te ni cundeyí
síquī ndíhi.

³Yūcuán na te Londe un ní jehnde
yā sello uū. Te ni jini sōho ri jeē
cahán inga jnáhan ndicúun jeē
técu:

Nehen te cuni rō.

⁴Te ni quenda iin caballo cuehé,
te jeē yosó síquī tī ndíso jniñu jeē
snáa jñuhun cáyūcu máni ñayuu
ñayiví, te quejéé i cahni jnáhan i.
Te ni nihín ún iin espada cáhnu.

⁵Yūcuán na te Londe un ní jehnde
yā sello unī. Te ni jini sōho ri jeē
cahán inga jnáhan ndicúun jeē
técu:

Nehen te cuni rō.

Te ni ndacoto ri, te ni jito ri iin
caballo jnuú. Te jeē yosó síquī tī

ndáhá iin balanza jeē chícuāha, chi coo jnamā xeēn. ⁶Te mēhñū ndicúun jeē técu un ní jini sōho ri iin jeē cahán:

Máá iin kilo-ni trigo nihin i jíin yáhu i jeē sájniñu i iin quivī. Te núu cebada, te unī-ni kilo nihin i jíin yáhu i jeē sájniñu i iin quivī. Te aceite jíin vino chi ma sáha ró jéé cúmanī. Achí.

⁷Yūcuán na te Londe un ní jehnde yā sello cuūn. Te ni jini sōho ri jeē cahán tucu inga jnáhan ndicúun jeē técu:

Nehen te cuni rō.

⁸Te ni ndacoto ri, te ni jito ri iin caballo cuaán yaa, te jeē yosó síquī tī cúu máá cuéhyī jéhni ñayuu. Te ichi yátá un ndíquín máá jnúhun jeē quívī ñayuu lugar nuū cáyūcu ánuá ndīyī. Te ndindúú un cándiso jniñu jeē ndóna síquī iin jeē ndicúun parte ñayīví, te cuu sáha jeē cúu ñayuu jíin guerra, jíin jnamā, jíin cuéhyī xeēn, jíin táca quítī xeén jeē iyó ñayīví.

⁹Yūcuán na te Londe un ní jehnde yā sello uhūn. Te chíji altar cáhnu ni jito ri anuá ñayuu jeē ní cacandíje jnúhun Yaā Dios te ni canacani ndaā i jnúhun ya, te síquī yūcuan ní cajehni ñayuu i. ¹⁰Te ni cacana jee ánuá un:

Jitoho ná Yaā Dios, maá ní cúu Yaā ndoo te vāha squícu ní jéē ni jéjnūhun ní. ¿Te nasaa ga tiempo coo te sándaā ni jéhé ná, te nacuāha ní jéē ndútahū ñayuu ñayīví jéé ní cajehni sáná? achí.

¹¹Yūcuán na te ni jēhe ya sahma cuijín cuhun i jíjnáhan i, te ni cahán yā jíin i jeē na ndétátú i jecu gā tiempo. Chi iyó gá hermano i

jeē cájejniñu nuū yā, jeē suni jíni ñúhún cuu i návāha jinu número i, achí yá.

¹²Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te ni cujnuú níandii nájnūhun iin sahma jnúú. Te ní yóo ni nduu nájnūhun niñī. ¹³Te quīmi andiví ní ñingoyo nuū ñúhun nájnūhun ñingoyo ndehē yīhí yujnu higo sáha tachī níhin. ¹⁴Te andiví ní cujiyo cuahán nájnūhun jeē nátuu iin tutu cáhnu. Te táca yucu jíin táca isla ni cujiyo cuangoo inga lado. ¹⁵Te táca rey ñayīví, jíin jéé cácujuhnu, jíin jéé cucá, jíin táca capitán, jíin jéé cándiso poder, jíin mozo jeē ní cajeen ñayuu, jíin téé casájniñu cuenta maá, ní cachisāhi máá ini yaū cava jíin méhñu cava chíji yucu. ¹⁶Te ni cacahán i jíin yucu jíin cava:

Ndicó cáva síquī rī, na quísāhi rí návāha tú coto máá Yaā néne mesa ndácu jniñu, jíin Yaā cúu Londe jeē cuáha ya castigo xeēn ruhū. ¹⁷Chi ni quee maá quívī cáhnu jeē cuáha ya castigo, ¿te ndé iin canda condichi nuū yā? achí i jíjnáhan i.

Ñayuu táca yúcūn Israel jeē ni jécondee sello jneē

7 Te ná ni cuu jniñu yáha, te ni jito ri cuūn ndajéhé yā jeē cáhiin ndicúun lado ñayīví. Te cájesi yā nuū ndicúun tachī, návāha ma quéé nuū ñúhun ni nuū mar ni nuū ní iin yujnu. ²Te suni ni jito ri inga ndajéhé yā, vēji ichi núu cáne niandii. Te ndáhá yá sello Yaā Dios, Yaā técu. Te ni cahán jee ya jíin ndicúun ndajéhé un jéé ndíso jniñu jeē sáha daño nuū ñúhun íchi jíin núu mar:

³Ma sáha ró daño nuū ñúhun ni nuū tǎcá yujnu ni nuū mar, chi nde na tée yó sello jneē tǎca ñáyuu cájejniñu nuū Yaā Dios yō.

⁴Te ni jini sōho ri jeē achí jée iyó ciento uū xico cuūn mil ñáyuu jeē ni jécondee sello jneē. Te ñáyuu un cácuu tǎca yúcūn ñáyuu Israel. ⁵Te iyó úxí uū mil ñáyuu cácuu yucūn Judá jeē ni jécondee sello, jíin úxí uū mil yucūn Rubén, jíin úxí uū mil yucūn Gad, ⁶jíin úxí uū mil yucūn Aser, jíin úxí uū mil yucūn Neftalí, jíin úxí uū mil yucūn Manasés, ⁷jíin úxí uū mil yucūn Simeón, jíin úxí uū mil yucūn Leví, jíin úxí uū mil yucūn Isacar, ⁸jíin úxí uū mil yucūn Zabulón, jíin úxí uū mil yucūn José, jíin úxí uū mil yucūn Benjamín. Ndihi yucūn yáha cúu jeē ni jécondee sello.

**Ñáyuu cuehē jeē cáñuhun
sahma cuijín**

⁹Te ná ni cuu jniñu yáha te ni ndacoto ri, te ni jito ri cuehē ndasí ñáyuu. Te cúu i ñáyuu tǎcá nación jíin tǎca raza jíin tǎca yuhu jíin tǎca ñuu. Te cáhiin i nuū mesa nuū ndácu Yaā Dios jniñu jíin núu maá Yaā cúu Londe. Te siquí jeē cuehé ndasí i, te ni ñin ma cúu cahu nasaa i cúu. Te cáñuhun i sahma cuijín, te cándāhá i ñuū. ¹⁰Te ni cacana jee i:

Yaā Dios maá yó cúu jeē ní
jnama yóhó,

Yaā jeē néne nuū mesa jeē
ndácu jniñu,

jíin Yaā cúu Londe Yaā Dios.

Achí i jíináhan i. ¹¹Te ndihi ndajéhé ni cajicó ndúu yā cáhiin ya xiin mesa Yaā Dios, jíin xiin tēe jéhnu cándiso jniñu, jíin xiin ndicúún

jeē técu. Te ni cajecuiñí yití yá ni cachiñúhún yá Yaā Dios ichi núu mesa yā. ¹²Te ni cacahān yā:

Amén. Cúsiñi ni yō cahán yō jeē
yóhoyo vāha Yaā cúu Yaā Dios
maá yó.

Te luu cújéhnu ya te ndíchí yá.

Te na nácuatáhú yó nuū yā, te
na cóo yíñúhún yó núu yā.

Chi jniñi ya poder, te ndíso ya
cuehē fuerza jeē níí cáni cuiti.

Amén.

Achí tǎca ndajéhé yā.

¹³Yūcuán na te ni cahān ñin tēe
jéhnu un jíin rí:

¿Ndé ñáyuu cúu yāha jée cáñuhun
sahma cuijín, te ndé chi véjicoo i?

¹⁴Te ni cahān ri jíin de:

Máa ní cúu jeē jiní, Tátā.

Te ni cahān de jíin rí:

Yāha cácuu ñáyuu jeē ní cayāha
i jeē ní cajito i jnūndóho xeēn. Te
ni canacate i sahma i jíin níñi maá
Londe, te ni nduyaa vāha, cúu jeē
ní ndundoo ánuá i ni sáha ya. ¹⁵Jeē
yúcuan cúu jeē cáhiin i nuū mesa nuū
ndácu Yaā Dios jniñu, te cájejniñu i
ini templo yā nduú ñuú. Te Yaā jeē
néne nuū mesa, coto ya i jeē quéndōo
vāha i nuū yā. ¹⁶Te ma cúu gā i sōco,
te ma jichí gā i ndute. Te ma cayú gā
i nuū niāndii, ni ma ndóho ga i jeē
jihni. ¹⁷Chi máa Yaā cúu Londe jeē
néne nuū mesa jeē ndácu jniñu, coto
ya i nájnūhun jeē cúu i lanchi ya. Te
condeca ya i quihñi yā jíin i nuū cáne
ndute jeē cótecu i sáha. Te Yaā Dios
nacuaa yā ndute núu i jíináhan i, te
ma ndahyú gā i. Achí tēe jéhnu ún.

Siquí sello uxā jíin cóhō cūu oro

8 Te Londe un ní jehnde yā
sello uxā jeē ndihyú tutu

ún, te nayúú-ni ni iyo ini andiví nájñuhun sava hora. ²Te ni jito ri ndihúxá ndajéhé jeē cáhiin nuū Yaā Dios. Te ni cajéhe uxā trompeta nuū ndajéhé un. ³Yūcuán na te ni quee inga ndajéhé, ndáhá yá iin cohō cūu oro, te ni jecuiñī yā nuū altar. Te ni jēhe cuehē sūje cutú núu yā, návāha socō yā jíin jñuhun cájicān tahu ndihi ñayuu cácan díje Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñu. ⁴Te nuū cohō cūu jñī ndajéhé un ní cane ñuhmā sūje cutú, ni caa nuū Yaā Dios nde jíin jñuhun cájicān tahu ñayuu cácan díje Yaā Dios. ⁵Yūcuán na te ni quihin ndajéhé un cohō cūu un. Te ni scutú yá t̄cua ñuhūn jeē cayú nuū altar. Te ni jete yā nde ini ñayiví. Te ni sáha jeē ni cáhān taja, te ni ñhīn, te ni ndindēé taja, te ni jñāa.

Jñuhun siquī trompeta

⁶Yūcuán na te ndihúxá ndajéhé jeē cándāhá ndihúxá trompeta, ni casátūhva ya jeē tiví yā.

⁷Te ndajéhé iin ni tiví yā trompeta. Te ni cuun ññīf ini ñayiví jíin ñuhūn jeē ni sácā núu jíin níñī. Te ni cayú iin jeē uní parte ñayiví, jíin iin jeē uní parte yujnu, jíin iin jeē uní parte ite cuí.

⁸Te ndajéhé uū ni tiví yā trompeta. Te iin nájñuhun iin yucu cáhnu jeē cayú ñuhūn ni ñingava cuahān nuū mar. Te iin jeē uní parte mar ni nduu níñī. ⁹Te ni jihí iin jeē uní parte quití ñuhūn nuū mar. Te ni naa cuehē barco, chi iin iin jeē tāca únī ni naa.

¹⁰Te ndajéhé uní ni tiví yā trompeta. Te ni ñingava iin quími

cáhnu ichi ándiví, te cáyú nájñuhun cáyú iin yití cáhnu. Te ni ñingava siquī iin iin jeē tāca únī yūte jíin núu cáne ndute. ¹¹Te quími un nání quími uvuā. Te iin jeē uní parte ndute ni cuu uvuā. Te ni cajihí cuehē ñayuu ni sáha jeē ní cuu uvuā ndute ún.

¹²Te ndajéhé cuūn ni tiví yā trompeta. Te iin jeē uní parte niāndii jíin yóō jíin quími ni tiví. Te ni ndunee iin jeē uní parte i, te tuá ni cúndijin iin jeē uní parte nduu jíin ñuu.

¹³Te ni ndacoto ri, te ni jini sōho ri jeē cána jee iin ndajéhé yā jeē ndáva cuahān sava andiví:

Nacā xeēn gā ndoho ñayuu cáyucú ini ñayiví, chi je yajni cuecu uní gā trompeta jeē tiví uní gā ndajéhé, achí yá.

9 Te ndajéhé uhūn ni tiví yā trompeta. Te ni jito ri jeē ichi ándiví ní ñingava iin quími nde ini ñayiví. Te nuū quími un ní jēhe ndacáa jeē núne tūhnchi cúnú ndasí. ²Yūcuán na te ni nune un tūhnchi, te ni cane ñuhmā ni caa nájñuhun ñuhmā iin ijnū cáhnu. Te ñuhmā un ní sáha jeē ní cunee niāndii jíin ní núu tachí. ³Te nuū ñuhmā un ní canecoo tíca ndicuehyí, ni jitē núu tí ní cáhnu ñayiví. Te ni jēhe ya jñuhun jeē sáha tí nájñuhun cásáha tisuhma xeēn jeē iyó ini ñayiví. ⁴Te ni ndacu ya jniñu nuū t̄i jeē ma sáha tí daño ite jíin yúcū cuí jíin yujnu, chi máni ñayuu jeē tu ndéé sello Yaā Dios jneé i cúu jeē tuu tí. ⁵Te tu ní jēhe ya jñuhun jeē cáhni t̄i ñayuu, chi máni jeē stóho tí i uhūn yoō. Te sáha tí jeē jetú i nájñuhun jeē jetú

ñayuu jeē túu tisuhma i. ⁶Te quivī ún nducú ndasí ñayuu modo cuu i, te ma nihín i modo. Te vésú cuní i cuu i, te tú na modo cuu i.

⁷Te tíca ndicuéhyí un cáa ti nájnūhun caballo jeē cáhiyo tūhva quingoo nuū cuájnáhan. Te xiní tī ñūhun nájnūhun corona oro. Te nées ti nuū tée. ⁸Te íyó ixi ti jeē cáa nájnūhun ixi xíní ñahan. Te jnūhun ti cáa nájnūhun jnūhun ndícaha.

⁹Te ní tī ndihyú nájnūhun sahma cáa. Te níhin ndijēn tī nájnūhun níhin jeē cuángoo cuehē caballo nuū guerra cáñuhun ti carreta.

¹⁰Te suhmā tī ndíso iñu nájnūhun tisuhma. Te jíin súhmā tī cuu stóho ti ñayuu uhūn yoō. ¹¹Te íyó iin jeē cujéhnū nuū tī, te suu cúu ndajéhé jexeén jeē ndíto tūhnchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jéé snāā.

¹²Je ni yāha iin jnūndóho, te íyó úu gā jnūndóho jeē quíji.

¹³Te ndajéhé iñu ni tiví yā trompeta. Te ni jini sōho ri iin jnūhun jeē ni cáhān nde mēhñú ndicúun yiquí altar oro jeē íin nuū Yaā Dios. ¹⁴Te ni cahān un jíin ndajéhé iñu jeē ndahá trompeta:

Nandají ró ndicúun ndajéhé jeē nuhní yuhu yúte cáhnu jeē naní Eufrates, achí.

¹⁵Te ni nandají ndicúun ndajéhé un, návāha cahni iin jeē uní parte ñayuu ñayiví. Chi je cáhiyo tūhva ndajéhé un jeē siquí maá hora jíin quíví jíin yóō jíin cuiyā jeē cóo súcuan. ¹⁶Te ni jini sōho ri jeē achí jéé iyó úu ciento millón soldado jeē cáyoso caballo.

¹⁷Te ni steén gā yā nuū rí, te ni jito ndijin rí tēcá caballo. Te tēe cáyoso siquí tī cáñuhun de camisa cáa jeē cuehé, jeē ndeé, jíin jéé cuaán. Te xiní caballo un cándāa nájnūhun xiní ndícaha. Te yuhu ti quénda ñuhūn jíin ñúhmā jíin azufre. ¹⁸Te jíin úní jeē quénda yuhu caballo un, te ni jihí iin jeē uní parte ñayuu, suu jíin ñuhūn jíin ñúhmā jíin azufre. ¹⁹Chi yuhu ti jíin súhmā tī iyó fuerza jeē cáhni tī ñayuu. Chi suhmā tī cándāa nájnūhun coō, te íyó xíní, te jíin yúcuan stóho ti ñayuu.

²⁰Te sava ga ñayuu jeē tu ní jíhí jíin táca jnūndóho yāha, tu ní nácani ni i stóo i ídolo jeē ní casáha i. Te tu ní stóo i jeē cáchiñúhún i tēcá táchi jíin ídolo jeē ní cuvāha jíin oro jíin plata jíin cáa cuaán jíin yúu jíin yujnu. Te tēcá un chi tu cúu coto, ni tu cúu cuni sōho, ni tu cúu caca. ²¹Te ni tu ní cánacani ni i stóo i jeē jéhni i ndīyi, jíin jéé satásí i, jíin jéé jíca jnéni i, jíin jéé sacuíhná i.

Ndajéhé jeē ndahá libro lulí

10 Te ni jito ri inga ndajéhé yā jeē ndíso poder, ni cuun ya ichi ándiví. Te ñúsúcun yá vicō, te xiní yā ñūhun ticō vēhndé. Te nuū yā ndíndēe nájnūhun niándii, te síhin ya cáa nájnūhun uū síhín jeē cáa ná cáa ñuhūn. ²Te ndáhá yá iin libro lulí jéé núne. Te ni jeni ya jehé váha ya nuū mar, te jehé jecó yá nuū ñūhun íchi. ³Te ni cana jee téyí yá, nájnūhun jeē ndahyú ndícaha. Te ná ni cana jee ya, te ni cacahān uxā taja. ⁴Te ná ni cacahān uxā taja, te je íyó tūhva ri jeē tée ri jnūhun

un núú. Te ni jini sōho ri iin jnūhun ichi ándiví jeē ni cáhān jíin rí:

Chuvāha ró táca jnūhun jeē ní cacahān uxā taja ún, te ma steén rō, ni ma téé ró, áchí.

⁵Yūcuán na te ndajéhé jeē ní jito ri jeē iin nuū mar jíin núú ñūhun, ni ndonehen ya ndaha váha ya ichi ándiví. ⁶Te ni ndacunehen ya síhví máá Yaā jeē técu ní cáni, Yaā ni sáha andiví jíin ñáyivi jíin mar jíin táca ndíhi jeē iyó ini. Te jíin síhví yá un ní cahān teyí ndajéhé:

Ma cucuéé gá jeē jínu ñayívi. ⁷Chi núu na quéjéé ndajéhé uxā tiví yā trompeta, yūcuán na te squícu-ni Yaā Dios jnūhun sáhi yá, nájnūhun ni castūhun yá nuū tāca mozo yā, tēe ni canacani jnūhun ya nde jenahán, áchí ndajéhé.

⁸Yūcuán na te máá jéé ní jini sōho ri jeē ni cáhān ichi ándiví, ni cahān tucu jíin rí:

Cuáhán te quihin ró libro lulí jéé núne jeē ndahá ndajéhé jeē iin nuū mar jíin núú ñūhun, áchí.

⁹Te ni jehēn rī nuū ndajéhé un, te ni jicān rī jeē na cuáha ya libro lulí un núú rī. Te ni cahān yā:

Quihin te caji rō. Chi vixí sáha ini yuhu ró nájnūhun ndūxi, te chíji ró chi cuhiyá sáha, áchí yá.

¹⁰Yūcuán na te ni quihin ri libro lulí jeē ndahá ndajéhé yā, te ni yeji rī. Te vixí ni sáha ini yuhu ri nájnūhun ndūxi. Te ná ni cuu ni yeji rī, te ni jitē iyá ni rī. ¹¹Te ni cacahān jíin rí:

Cánuú jéé nacani tucu ró jnūhun Yaā Dios, ndese coo siquī ñayuu cuehē ñuu jíin cuéhē nación jeē síin síin yuhu, jíin síquī cuehē rey cándacu jniñu, áchí jíin rí.

Siquī uū testigo yā

11 Yūcuán na te ni cajēhe iin yujnu nuū rī, jeē cúu iin cūhva jeē chícuāha. Te ni cacahān jíin rí:

Ndocuñī te chicuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñúhún núú yā yūcuán. ²Te ma chícuāha ró patio yatā templo. Chi je ni jēhe ya nuū ñayuu tācá ñuu jicá. Te coyúcú i ini ñuu ií yāhá, te uū xico uū yoō cueñū i siquī ñuu. ³Te tají rí uū testigo rī jeē nácani jnūhun ri mil uū ciento unī xico quiví. Te cuhun de sahma ndáyí jéé cácuquíhyá ni de siquī cuéchi ñayuu, áchí yá.

⁴Te ndíndúú testigo un cúu nájnūhun ndíndúú yujnu olivo jíin ndíndúú candelero jeē iin nuū Yaā Dios, Yaā chíí ñayívi. ⁵Te na-ni ñayuu núu nducú sáha ndevāha jíin ndíndúú testigo un, te quenda ñuhūn yuhu ndíndúú de, te cayū ndíhi ñayuu cájito uhū i de. Te súcuan cuu tāca ñayuu jeē nducú sáha ndevāha jíin de. ⁶Te iyó poder ndíndúú testigo un jéé cási de jeē ma cúun saū ní tiempo jeē nácani de jnūhun ya. Te suni íyó poder de sáha de jeē nduu niñī tācá ndute. Te cuu stíví de ñayívi jíin ndínuū jnūndóho, núu nasaa jínu cácuni de. ⁷Te ná ni jínu ni canacani de jnūhun ya, yūcuán na te quenda quiti xéén jeē néne tūhñchi ún. Te cuajnáhan jíin ndíndúú de, te cundeyí jíin de, te cahni de. ⁸Te ndíyí ún cava nuū yáhu ñuu cáhnu nuū ní cajehni i máá Jítoho yō jicā cruz. Te ñuu un cácahān yatá i jeē ñuu Sodoma jíin Egipto cúu, siquī jeē xeēn cuéchi

íyó ñuu ún. ⁹Te ñayuu tācá ñuu, tāca yúcūn, tācá yuhu, tācá nación, chi coto i jeē cáva ndíndúú ndíyí un úní quiví yosáva, te ma cuáha i jñūhun jeē quíndūji. ¹⁰Te ñayuu níí cáhnu ñayíví cusí ndasí ni i jeē ní cajihí de, te sáha i vico, te cuáha i regalo nuū jnáhan i. Chi ndíndúú tée ni canacani jñūhun ya ún, ní casáha de jeē ní candoho ndasí ñáyuu ñayíví. ¹¹Te jeē yáha uní quiví yosáva ún, te Yaā Dios sáha ya jeē nastáa tachí de, te ndonda-ni de. Te yūhú ndasí ñáyuu coto i jeē ní canatecu de. ¹²Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, áchí.

Te ndaa de mēhñu vícō quingoo de andiví, cuni ñayuu cájito uhí i de. ¹³Te máá hora un jnáa ndasí, te ndicó cáva naa ñin jeē uxí parte ñuu ún. Te jíin ñujnáa ún cuu uxā mil ñayuu. Te tāca gá ñayuu jeē ndóo, yūhú ndasí i, te cahān i jeē cujéhnu Yaā Dios jeē ndeé andiví.

¹⁴Súcuan yāha jñūndóho uū, te yachí coo jñūndóho uní.

Siquí trompeta uxā

¹⁵Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān:

Tācá nación ñayíví je ni nuquihí ndaha máá Jítoho yō Yaā Dios jíin Cristo jeē ní tají yá.

Te ndacu ya jniñu níí cáni cuiti. Achí.

¹⁶Yūcuán na te ndihóco cuñ tēe jéhnu cándiso jniñu jeē cánene de mesa de ichi núú Yaā Dios, ni cajecuññí yítí de, ni cachiñúhún de ya. ¹⁷Te ni cacahān de:

Na cútahū na núú ní, Tátā Yaā Dios, chi máá ní jñí ndihí poder, te cúu ní Yaā iyó vijna, te ni iyo ní níí cáni, te coo ní níí cáni. Te ni najniñi ní ndívii jeē iyó, te jíin poder ni ní quejéé ní ndácu ní jniñu nuū.

¹⁸Ñayuu tācá nación ni caquití ni i siquí ní.

Te vijna chi ni quee quiví jeē cuáha ní castigo i, jíin jéé sándaā ní jniñu tāca ndíyí.

Te cuáha ni táhū nuū tāca mozo ni jéé ní canacani jñūhun ní, jíin núú tāca ñáyuu cájéjniñu nuū ní, jíin ñáyuu cáchiñúhún núú ní, cúu ñayuu cácujeñu jíin jéé tuú.

Te vijna te snáhnú ndetū ni ñáyuu castívi ñayíví.

Achí de jíjnáhan de.

¹⁹Yūcuán na te ni nune templo Yaā Dios jeē iyó andiví. Te ni cajito ñayuu jeē yúcuan íne yejnú jeē ñūhun contrato yā. Te ni ndíndēe taja, te níhin, te cáhán taja, te ni jnáa, te ni cuun xeēn ñiñí.

Jñūhun ñahan jíin cóo cáhnu

12 Yūcuán na te ini andiví ní cane ñin jeē nahán náa ni yō jíto yó: ñin ñahan jeē ñūhun ña niāndii nájnūhun sahna, te íin jehé ña siquí yoó, te ñūhun ñin corona xiní ña jeē ndeé uxí uū quími. ²Te ñūhun sēhe ña. Te ni ndahyū cohó ña jeē ndóho ña jéhnde chiji ña jeē scácu ña i. ³Yūcuán na te ini andiví ní cane tucu inga jeē náa ni yō jíto yó: ñin cóo cuehé cáhnu ndasí. Te

íyó úxā xinī tī jín úxī ndiqui tí. Te ndihúxá xinī tī ñuhun corona. ⁴Te jín súhmā tī ni stáa ti ñin jeē uní parte quimi jeē iyó andiví, te ni síngoo tī ini ñayiví. Te ni ine tī nuū ñáhan jeē scácu sēhe ún, ndétu tī cocó tí sēhe ña jeē jé yajni cacu i.

⁵Te ni scácu ña ñin sēhe yíí, te sūchi un ní jeconaā jeē ndácu ñihin i jniñu nuū ndívii nación. Yūcuán na te ni ndoñuhún sēhe yíí ña ún, ni ndaa i cuahān i nde nuū ñin mesa Yaā Dios nuū ndácu ya jniñu. ⁶Te ñahan un ní jinu ña cuahān ña nde nuū ñuhun téhé nuū iyó ñin lugar jeē ni sátuhva Yaā Dios. Te yūcuán condee ña ñihin ña jeē cáji ña mil uū ciento uní xico quiví.

⁷Yūcuán na te ni cajejnáhan ini andiví. Chi ndajéhé jéhnū ga jeē naní Miguel jín táca ndajéhé jeē cácuu mozo nuū yā, ni cajejnáhan jín cóo cáhnu. Te coō un jín táca ndajéhé maá, ni cajejnáhan jín yá.

⁸Te tu ní cácuñdeyí tí, te tuá ní cúu coyūcu tí andiví. ⁹Súcuan ni cuu jeē ní quenehen ya coō cáhnu un jéē iyó ndé jenahán ndasí. Te naní tí jexeén jín Satanás, te maá tí cúu jeē stahú ndihí ñayuu ñayiví. Te ni scáne ya tī nde ini ñayiví jín táca ndajéhé tī.

¹⁰Yūcuán na te ni jini sōho ri ñin jñuhun jeē cahán jee ichi ándiví:

Je ni quee quiví jeē jínu jnama ya yohó, jín jéē steén ndijin yā jeē jnái ya poder, jín jéē ndácu ya jniñu, jín jéē ndíso jniñu maá Cristo jeē ní tají yá. Chi je ni quenehen ya maá jéē cahán cuēchi siquí táca hermano yō. Chi nduú ñuú ni cahán cuēchi siquí i nuū Yaā Dios maá yó. ¹¹Te ni cacundeyí i siquí Satanás

un, ní sáha jñuhun jeē ni jíhi Yaā cúu Londe, jín jéē ní cacahān ndaā i jñuhun Yaā Dios, jín jéē tu ní cundáhú ni i máá i, chi ni jēhe i jñuhun candíje i vēsú núu cuu i jeē siquí yā. ¹²Núu súcuan te na cúsiñ ndasí ni táca róhó jéē cáyucú andiví. Te nacā xeēn ndoho táca róhó jéē cáyucú ini ñayiví jín núu mar. Chi ni cuun jexeén ni jinū nuū rō jijnáhan ró. Te quítí xeēn ni, chi jíní jeē tuá coo cuehē gā tiempo jeē stahú ñayuu. Achí.

¹³Te ni jini coō cáhnu ún jéē ni scáne ya maá cuahān ini ñayiví, te ni jinu tī jín ñahan ní scácu sēhe yíí, jeē xeēn sáha tī jín ña núu.

¹⁴Te ni cajēhe uū ndijēn yaha chócó cáhnu nuū ñahan ún, návaha ndava ña quihín ña lugar ña nuū ñuhun téhé, te cācu ña nuū coō ún. Te yūcuán condee ña uní cuiyā yosáva, te ñihin ña jeē cáji ña. ¹⁵Te yuhu cóo un ní cane ndute nájñuhun ñin yūte cáhnu, cuahān yatā ña návaha jneni ña. ¹⁶Te maá ñuhun chi ni chindéé ñáhán ñahan ún, chi ni nune-ni, te ni nungoo yūte jeē ní cane yuhu cóo ún. ¹⁷Yūcuán na te xeēn ni quití ni coō cáhnu ni jito tī ña. Te cuahān tī cuajnáhan tī jín táca gá sēhe ña, suu ñayuu casquícu jniñu ndácu Yaā Dios te cácuñdeje vāha i jñuhun Jesucristo.

Jñuhun siquí uū quití xéén

13 Te ni indichi rí yumár. Te ni jito ri jeē ní cane ñin quití xéén ini mar. Te íyó úxā xinī tī jín úxī ndiqui tí. Te ndihúxá ndiqui tī ñuhun corona. Te ndihúxá xinī tī ndeé ñin síhví néé jéē quití ni Yaā Dios sáha. ²Te quití xéén jeē

ní jito ri ún, cáa tì nájñūhun cuiñī, te ndaha tì cáa nájñūhun ndaha oso, te yuhu tì cáa nájñūhun yuhu ndícaha. Te nuū quiti un ní jēhe coō cáhnu poder maá jíin mesa nuū ndácu maá jniñu. Te ni sáha jeē cujéhnu ndasí quiti ún. ³Te ni jito ri jeē ni tújī ñin xinī tī, jeē jé yajni cuu tī nuū. Te ni nduvāha tì jeē ni tújī tī. Te nahán ní naa ni ñayuu ní cáhnu ñayīvi ní jito i, te ni cajetáhú i nuū tī. ⁴Te ni cachiñúhún i coō cáhnu siquī jeē ni sáha tì jeē cujéhnu ndasí quiti xéén un, te suni ni cachiñúhún i quiti xéén un. Te ni cacahān i:

Tú ni ñin jeē cujéhnu nájñūhun quiti yáha, te tú ni ñin cundeyí cuajnáhan jíin tī, áchí i jíinájhan i.

⁵Te tu ní jési ya jeē cahān tī jeē quiti téyí cúu tì, jíin jéé cahán ndevāha tì siquī yā. Te ni nihñ jniñu tì jeē ndácu tì jniñu uū xico uū yoō. ⁶Te ni quejéé tī ni cahān ndevāha tì siquī Yaā Dios, jíin síquī síhví yá, jíin síquī nuū ndeé yá, jíin síquī tāca jéé iyó andiví. ⁷Te tu ní jési ya jeē cuajnáhan tì jíin ñayuu maá Yaā Dios, te cundeyí tī jíin i. Te suni ni nihñ jniñu tì jeē ndácu tì jniñu nuū ñayuu tāca yúcūn, tācá ñuu, tācá yuhu, tācá nación. ⁸Te ñayuu ní cáhnu ñayīvi jéé tu yósó síhví i nuū tútu, ni cachiñúhún i quiti xéén un. Te Yaā cúu Londe jeē ní cajehni i, máá yá névāha tutu un jéé yósó síhví ñayuu cotecu ní cáni, te je yósó síhví i nde quiví ni jécō ñayīvi.

⁹Ñayuu iyó sóho na chúsóhó váha i jñūhun cahān rī yāhá. ¹⁰Tāca ñayuu jeē sáha jeē quiví jnáhan vecāa, suni vecāa cone máá i. Te

tāca ñayuu jeē jéhni jnáhan jíin espada, suni jíin espada cuu maá i. Núu súcuan te ñayuu maá Yaā Dios chí jíni ñúhún cuandeyí ni i jíin jñúndóho te ma jécuiñī i candíje i jñūhun cúndáhú ni yā i.

¹¹Yūcuán na te ni jito ri ñga quiti xéén jeē ní cane chíjī ñuhun. Te íyó úu ndiqui tì jeē cáa nájñūhun ndiqui lánchi. Te nájñūhun tachī coō cáhnu, súcuan tachī cahán tī.

¹²Te nájñūhun ndácu quiti xéén xihna ñúhún jniñu, suni súcuan ndácu quiti uū ún jniñu, ñin tì nuū quiti xihna ñúhún. Te quiti uū sáha tì jeē chiñúhún tāca ñayuu ní cáhnu ñayīvi nuū quiti xihna ñúhún, quiti ní tújī jeē jé yajni cuu tī te ni nduvāha tī. ¹³Te quiti uū suni sáha tācá jniñu jéhnu jeē nahán nāa ni yō jito yó. Chí ni scúun tì ñuhún ichi ándiví ní quiji ini ñayīvi, ní cajito ñayuu. ¹⁴Te ni stahú tī ñayuu ñayīvi jíin tāca jniñu jéhnu jeē ni níhñ tī poder jeē sáha tì, jito jíinúu quiti xihna ñúhún. Te ni ndacu tì jniñu jeē na sáha ñayuu imagen quiti xihna ñúhún, quiti ní tújī jíin espada, jeē jé yajni cuu tī te ni nduvāha tī. ¹⁵Te quiti uū ni nihñ tī poder jeē chutáchí tī xijni imagen quiti xihna ñúhún, návāha cuu cahān, te cahni tāca ñayuu jeē tu cájetáhú i chiñúhún i máá.

¹⁶Te tāca ñayuu cujéhnu jíin ñayuu tu cujéhnu, tāca ñayuu cucá jíin ñayuu ndahú, tāca ñayuu sájniñu cuenta maá jíin mozo jeē ní cajeen ñayuu, ni sáha tì jeē ni jécondee ñin jñunī ndaváha i chí jnéé i. ¹⁷Te ni ñin ñayuu ma cúu cuaan i xícó i te núu tu ndíso i jñunī jeē cúu síhví tī chí jñunī número jeē cúu síhví tī.

¹⁸Jnūhun ndíhí cúu jeē cahán rī yāhá: Tāca ñáyuu jécūhun vāha ni cuu tava i cuenta número quitī xéén un, chí número un cúu síhví iin tēe. Te número un cúu iñū ciento unī xico iñū.

Yaa jeē cájita 144,000 ñayuu

14 Yūcuán na te ni ndacoto ri, te ni jito ri jeē iin máá Yaa cúu Londe xinī yucu Sión. Te cáhiin ciento uū xico cuūn mil ñayuu jíin yá. Te jneē i ndéé síhví máá yá jíin síhví Tátá yā Yaa Dios. ²Te ni jini sōho ri jeē nāhin ndasí ichi ándiví, nájñūhun jeē jica cuehē yūte chí jēē cahán nāhin taja. Te jeē nāhin un sāha nájñūhun jeē cátee cuehē ñayuu yaa jeē naní arpa. ³Te cáhiin i ichi núu mesa nuū ndácu Yaa Dios jniñū, jíin núu ndicúún jeē técu, jíin núu ndihócó cuūn tēe jéhnū cándiso jniñū. Te ni cajita i iin yaa jeé. Te ni iin ñayuu tu cúu cutūhva i yaa ún, chí máni máá ciento uū xico cuūn mil ñayuu jeē ní jnama ya i ini ñayiví. ⁴Te tāca tēe yāha cácuu jeē tu ní cásáha cuēchi jíin ñahan cásáha néé, chí tēe ndoo ánuá cácuu de. Te cándiquin de Londe ndé-ni cúu-ni nuū cuahán yā. Chí ni jnama ya de ini ñayiví, te máá de cácuu tēe jeē xíhna gā ni cacandíje nuū Yaa Dios jíin núu Yaa cúu Londe. ⁵Te tú cuiti na jnūhun stáhú cácahān de, chí tēe ndoo ánuá cácuu de, cáhiin de nuū mesa Yaa Dios.

Jnūhun jeē ní cacahān
ndinúní ndajéhé yā

⁶Yūcuán na te ni jito ri inga ndajéhé yā jeē ndáva cuahān sava

andiví. Te ndíso ya jnūhun jeē jnáma Yaa Dios ñayuu cotecu i níí cáni. Te ni nacani ya jnūhun un núu tāca ñáyuu níí cáhnu ñayiví, nuū ñáyuu tācá nación, tāca yúcūn, tācá yuhu, tācá ñuu. ⁷Te ni cahān jee ya:

Conso iyo ró núu Yaa Dios, te na cáhán rō jeē yóhoyo cújéhnū ya, chí je ni quee quiví jeē sándaā yā siquī rō ndese ni casáha ró. Te na chíñūhún ró yā, chí máá yá ni sāha andiví jíin ñayiví jíin mar jíin táca núu cáne ndute, áchí ndajéhé yā.

⁸Yūcuán na te ndíquin inga ndajéhé yā vēji, te ni cahān yā:

Je ni naa iñū teyí Babilonia. Chí ni sāha jeē ñáyuu tācá nación casíquí ndéē i Yaa Dios jeē ní castóo i ya te cándiquin i ídolo jíin táca jniñū néé, áchí ndajéhé uū.

⁹Yūcuán na te ndíquin inga ndajéhé unī vēji, te ni cahān jee ya:

Xeēn coo siquī ñayuu cáchiñūhún quitī xéén jíin imagen tī, te jéhe i jnūhun condee jnunī tī jneē i chí ndaha i. ¹⁰Chí nihin i castigo xeēn siquī cuéchi ni casáha i, chí quitī ni Yaa Dios nuū i, te tuá cone cáhnu ni yā. Te ndoho i nuū cayú ñuhūn jíin azufre, coto tācá ndajéhé Yaa Dios jíin Yaa cúu Londe. ¹¹Te ñuhmā nuū cándoho i cánda níí cáni cuiti. Te nduú ñuú tu ndétātū ñayuu cándoho ún jeē ní cachíñūhún quitī xéén jíin imagen tī, jíin jéē ni jécondee jnunī síhví tī. ¹²Jeē yúcuan ñáyuu maá Yaa Dios jeē casquícu i jniñū ndácu ya te cácaandíje vāha i Jesús, cánuú jéē cuándeyí ni i. Achí ndajéhé unī.

¹³Yūcuán na te ni jini sōho ri iin jnūhun ichi ándiví jéē ni cáhán jíin rí:

Tee ró jnúhun jeē cahán rī jín ró yāhá: Nacā jeē ndetū tāca ñayuu cācandīje Jitoho yō jeē cājihī vijna jín ndé ní cuáhān yō. Jendaá chi ndetātú i jeē ní casáha i jniñu váha, te jniñu i un má nāá chi sáha jeē quendōo vāha i ní cáni, áchí Espíritu.

Jeē ní nastútú yá ñayuu ñayiví

¹⁴Yūcuán na te ni ndacoto ri, te ni jito ri iin vicō cuijín. Te nuū vicō un néne Yaā ní nduu tēe. Te xinī yā ñúhun corona oro, te ndáhá yá iin hoz xeēn. ¹⁵Te ni quenda inga ndajéhé yā ini templo, te ni cana jee, te cāhán jín Yaā néne nuū vicō un:

Cahnde ni jín hoz ní, te nastútú ní ñayuu ñayiví. Chi je ni quee quiví jeē nastútú ní i nájñuhun táhndé trigo jeē jé ni cuaan, áchí.

¹⁶Yūcuán na te Yaā néne nuū vicō ni nastútú yá ñayuu váha ini ñayiví, nájñuhun táhndé trigo jín hoz.

¹⁷Yūcuán na te ni quenda inga ndajéhé yā ini templo jeē iyó andiví, te suni ndáhá yá iin hoz xeēn. ¹⁸Te nde nuū altar ni quenda tucu inga ndajéhé, te ndíso jniñu ya siquī ñuhūn altar. Te ni cana jee ya, te cāhán yā jín ndajéhé jeē ndahá hoz xeēn:

Cahnde rō jín hoz xeēn rō, te nastútú ró ñayuu casáha néé ini ñayiví, nájñuhun jeē cájehnde i chutū ndehē uva jeē jé ni jichi, áchí.

¹⁹Te ndajéhé un ní jehnde yā jín hoz yā, te ni nastútú yá ñayuu casáha néé ini ñayiví, nájñuhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájñuhun jnaa i ndehē uva

nuū taxín. ²⁰Te ni jēhe ya castigo i yatā ñúū, te ni jica niñí i nájñuhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde unī ciento kilómetro.

Ndihúxá ndajéhé jín ndihúxá jnūndóho jeē sándihí

15 Te ni jito ri inga jniñu jéhnu ichi ándiví jéé nāá ni yō jito yó. Chi cáhiin uxā ndajéhé yā jeē cuáha ndihúxá jnūndóho sandihí na. Te jeē jínu ndihúxá jnūndóho yáha, te jinu jeē cuáha Yaā Dios castigo xeēn siquī cuéchi.

²Te suni ni jito ri iin jeē cáa nájñuhun mar, te cáa nájñuhun vidrio jeē ndíndēe nájñuhun ñuhūn. Te yumar un cáhiin ñayuu ni cacundeyí siquī quiti xéén jín imagen tí, jín jéé tu ní cáquihin i jnuni número jeē cúu síhvi tí. Te cándāhá i yaa jeē naní arpa jeē ni jéhe Yaā Dios nuū i. ³Te cājita i yaa jeē ní tava Moisés, tēe cúu mozo Yaā Dios, jín yaa maá Yaā cúu Londe. Te súcuan cāhán yaa ún:

Yōhyo nāá ni na cājito ná ndihi jniñu jéhnu teyí jéé sáha ní, Tātā Yaā Dios, chi jniñí ní ndihi poder.

Te máni jniñu ndaā jniñu váha sáha ní, jeē cúu ní Rey nuū tācá nación.

⁴Tú ni iin i iyó jéé ma cónso iyo i nuū ní, Tātā Yaā Dios.

Te ndihi i cahān nahín i jeē yóhyo cújéhnu ní.

Chi máñuhún ni máá ní cúu Yaā ndoo Yaā ii.

Te quijicoo ñayuu tācá nación, chiñuhún i níhín, chi je ni cajini i jeē ndaā váha sáha ní táca jniñu.

Achí i cájita i.

⁵Yūcuán na te ni ndacoto ri, te ni jito ri jeē ini andiví núne cuarto iini templo nuū íne tabla yuū jeē yosó ley yā. ⁶Te ini templo un ní quendacoo ndihúxá ndajéhé jeē cándiso jniñu siquī ndihúxá jnūndóho. Te cáñuhun ya sahma fino iyó ndoo te xíñú. Te núhni cinturón oro jicā yā. ⁷Te iin jnāhan ndicúun jeē técu ni jéhe iin iin cohō oro nuū ndihúxá ndajéhé un. Te ini cohō un ñuhun chitú castigo xeēn jeē ni jéhe Yaā Dios, Yaā técu ní cáni. ⁸Te ni chitú ndí ñuhmā ini templo, te suu ni steén jeē yóhyo cújéhu Yaā Dios jíin poder jnāi ya. Te ni iin tu ní cúu quivi ini templo, chi nde na ndíhi ndihúxá jnūndóho jeē cuáha ndihúxá ndajéhé yā.

**Siquī ndihúxá cohō jeē
ñuhun castigo**

16 Yūcuán na te ini templo ni jini sōho ri iin jnūhun cáhán jee jíin ndihúxá ndajéhé yā:

Cuangoo te cati ró siquī ñayiví ndihúxá cohō jeē ñuhun castigo xeēn jeē ni jéhe Yaā Dios, achí.

²Te cuahān ndajéhé iin, te ni jeti ya cohō yā siquī ñayiví. Te tāca ñayuu jeē ndeē jnunī quití xéén un jíin jéé cáchiñuhún imagen tī, ni canecoo ndíhyi xeēn jeē jetú ndasí.

³Te ndajéhé uū ni jeti ya cohō yā nuū mar, te ndute mar ni nduu nájnūhun niñi ndíyí. Te ni cajihí táca quití jeē ñuhun ini mar.

⁴Te ndajéhé unī ni jeti ya cohō yā ini tāca yúte jíin táca núu cáne ndute, te ni nduu niñi. ⁵Te ni jini ri jeē cahán ndajéhé jeē ndíso jniñu siquī ndúte:

Tátā Yaā Dios, maá ní cúu Yaā ndoo Yaā ií, Yaā iyó vijna, te ni iyó ní ní cáni. Te ndaā sáha ní jeē súcuan ni ndonda ní síquī cuéchi i. ⁶Chi ni casáha i jeē ní jeti niñi ñayuu ndoo ní jíin ñayuu ní canacani jnūhun ní. Te vijna chi ni sáha ní jéé cájihí i niñi, chi ñayuu casáha jniñu néé cácuu i, jeē cánuú ndoho i súcuan.

⁷Te ni jini sōho ri jeē cahán inga nde nuū altar:

Tátā Yaā Dios, maá ní cúu jeē jnāi ndíhi poder. Te jniñu váha jniñu ndaā ni sáha ní jéé ní ndonda ní síquī cuéchi i. Achí.

⁸Te ndajéhé cuūn ni jeti ya cohō yā siquī níandii, te ni jéhe Yaā Dios jnūhun jeē ndujíhni ndasí níandii návāha cayū ñayuu. ⁹Te xeēn ndasí ní cayū tāca ñayuu. Te vēsú súcuan te tu ní canacani ni i stóo i cuéchi i, ni tu ní cácahān i jeē cújéhu Yaā Dios. Chi sa suhva ni cacahān ndevāha i siquī yā jeē ni jéhe ya tāca castigo yāha nuū i.

¹⁰Te ndajéhé uhūn ni jeti ya cohō yā nuū mesa nuū ndácu quití xéén jniñu. Te ni cunee ní cáhnu nuū ndácu tí jniñu. Te cánacayihí ñayuu yuhu i jeē cájetú ndasí i. ¹¹Te vēsú súcuan te tu ní canacani ni i stóo i jniñu néé casáha i. Chi sa ni cacahān ndevāha i siquī Yaā Dios andiví síquī jeē cájetú ndasí i jíin ndíhyi xeēn cándoho i.

¹²Te ndajéhé iñu ni jeti ya cohō yā siquī yúte cáhnu jeē naní Eufates. Te ni ichi ndíhi ndute yúte ún, návāha nune iin ichi jeē quíjicoo tāca rey ichi núu cáne niandii.

¹³Te ni jito ri jeē ini yuhu cohō cáhnu jíin ini yuhu quití xéén jíin

ini yuhu máá téé nácani jnūhun stáhú ní canecoo unī tachī jeē cáa nájnūhun sáhvá. ¹⁴Te tachī ún chi ndajéhé jexeén cácuu, te cásáha jniñu jéhu jeē náa ni ñayuu cájito i. Te ni quendacoo tachī un jéé nastútú táca rey ní cáhnu ñayīvi, jéé cuajnáhan de siquī Yaā Dios quivī jeē ndíji ya. Te máá yá cúu jeē jñí ndíhi poder. ¹⁵Cuni sōho jíjnáhan ró, chi sanaa ni rō te ndiji ri, nájnūhun jeē iin sanaa-ni te quíji ñacuíhná. Te nacā jeē ndetū ñayuu jeē ndito ni i, te ndito yúcún i sahma i, návāha ma cáca vichí líi i, cúu jeē tú na cuēchi coo siquī i jeē cucanu i nuū tāca ñayuu, achí yá. ¹⁶Te ni canastútú táchi un táca rey, ni candutútú iin lugar jeē yuhu hebreo naní Armagedón.

¹⁷Te ndajéhé uxā ni jeti ya cohō yā nuū tachí. Te ini templo andiví jíjn núu mesa nuū ndácu ya jniñu, ni cane iin jnūhun jeē ni cáhān jee:

Je ni jīnu, áchí.

¹⁸Yūcuán na te ni ndindéé taja, te níhin, te cáhān taja, te ni jnāa ndasí. Chi nde ní cáni jeē iyó ñayuu ñayīvi, tu ní jnāa nihin ndasí nájnūhun jeē ni jnāa ni jito ri. ¹⁹Te máá ñuu cujéhu Jerusalén, ni cusín ni nduu unī parte, te ní cáhnu ñayīvi ni naa tāca ñuu. Te ñuu teyí Babilonia, chi ni sáha nahín yá jeē ní ndutahū i castigo xeēn, chi ni quitī ndasí ni yā siquī cuéchi i. ²⁰Te ni naa tāca isla, te suni yucu tuá gā. ²¹Te ichi ándiví ní cuun ñíñí náhnu siquī ñayuu, jeé véyi nde uū xico kilo. Te ni cacahān ndevāha ñayuu siquī Yaā Dios jeé ní cuun ndasí ñíñí, chi iin jnūndóho xeēn ni cuu.

Jeē ndonda ya siquī ñuu
neé Babilonia

17 Yūcuán na te ni quiji iin jnāhan ndihúxá ndajéhé jeé ní candāhá ndihúxá cohō ún, te ni cahān yā jíjn rí:

Nehen, te na stéén rī nuū rō ndese coo castigo siquī máá ñahan jnéni jeé cúu ñuu cujéhu íne nuū iyó cuéhé ndute. ²Chi tāca rey ñayīvi nájnūhun ni casíquí ndéé de jíjn ñahan ún, cúu jeé ní castóo de Yaā Dios te cándiquín de jnūhun neé ní steén ña. Te ni sáha ña jeé ñayuu ní cáhnu ñayīvi, nájnūhun nájini i te casíquí ndéé i Yaā Dios cúu jeé ní castóo i ya te cásáha ndasí i cuéchi. Achí ndajéhé yā.

³Te ni sáha ga Espíritu Santo jeé ní jito ndijin rí, te ndajéhé yā un cuáhān yā jíjn rí nde nuū ñūhun téhé. Te ni jito ri iin ñahan, yósó ña iin quitī xeén cacuéhé. Te ní cáhnu tí ndeé jnūhun neé jéé quití ni Yaā Dios sáha. Te íyó úxā xinī tī jíjn úxí ndiquí tí. ⁴Te ñahan un ñūhun ña sahma ndihí jíjn sahma cuehé, te suni ñūhun ña siquī oro jíjn yúu luu jíjn perla jeé ndeé yahu. Te ndáhá ña iin cohō oro jeé ñūhun chitú jíjn jniñu neé ndasí jíjn jniñu jnehén jéé jíca jnéni ña. ⁵Te jneé ña ndéé iin síhvi jéé cúu iin jnūhun sáhi, te suhva cáhān: Yāha cúu ñuu teyí Babilonia, jeé cúu nájnūhun náná tāca jéé cájica jnéni jíjn jéé casáha neé ndasí ini ñayīvi, áchí. ⁶Yūcuán na te ni jini rí jeé ñahan un nájini ña jeé nájnūhun ni jihi ña níñi ñayuu máá Yaā Dios jíjn níñi ñayuu ni cajihí siquī jeé ní canacani ndaā i jnūhun Jesús. Te nahán ní naa

ni rī ni jito rī ña. ⁷Yūcuán na te ni cahān ndajéhé un jíin rí:

¿Naun nāa ni rō jíto rō? Na cástūhun rí nuū rō ndese cúní cahān jnūhun sāhi síquī ñahan un jíin quití xéén yosó ña, jeē iyó úxā xinī tī jíin úxī ndiqui tī. ⁸Quití xéén jeē ní jito ró, chi ni cotecu tī, te vijna chi tuá tī. Te ndenda tucu tī ini tūhnchi cúnú, te yūcuán na te quihīn tī nuū jnahnú ndetū tī. Te ñayuu cáyūcu hí cáhnu ñayíví, naa ni i coto i nuū quítí un jéé ní cotecu tī te ni jihī tī, te natecu tucu tī. Te cácuu i ñayuu jeē tu yósó síhví i nuū tútu jeē yosó síhví ñayuu cotecu ní cáni jeē ni jécósó síhví i nde quiví ni jécōo ñayíví.

⁹Tāca ñayuu jécūhun vāha ni, cuu tava i cuenta ndese cúu: Ndihúxá xinī tī cácuu nájnūhun uxā yucu nuū néne ñahan ún. ¹⁰Te ndihúxá xinī tī suni cácuu nájnūhun uxā rey. Te uhūn rey un je ni naa jeē ndácu de jniñu, te ñin de ndácu jniñu vijna, te ñnga de chi ná tu quiji de. Te núu na quíji de te jecu-ni tiempo coo de. ¹¹Te quití xéén jeē ní cotecu te tuá iyó tī vijna, máá tī cuu rey unā. Te ñin jnāhan ndihúxá rey un cúu tī. Te suni quihīn tī nuū jnahnú ndetū tī.

¹²Te ndihúxí ndiqui jeē ní jito ró cúu nájnūhun uxí rey, te ná tu ndacu de jniñu jíjnāhan de. Te máá de jíin quití xéén un, chi nihīn jniñu de cuu de rey jecu-ni tiempo. ¹³Te ndihúxí rey un chi squíjnāhan de jnūhun, te nacūaha de poder de jíin jniñu ndíso de nuū quití xéén un návāha ndacu tī jniñu. ¹⁴Te cuajnáhan de jíin Yaā cúu Londe. Te Yaā cúu Londe quende yā poder de

jíjnāhan de. Chi máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhiin jíin yá, chi ni nacāji Yaā Dios i te ni cana ya i, te cásquícu vāha i. Achí ndajéhé un.

¹⁵Te ni cahān gā yā:

Cuehē ndute jeē ní jito ró núu néne ñahan jíca jnéni, suu cúu ñayuu cuehē tācá ñuu, tācá yuhu, tācá nación. ¹⁶Te ndihúxí ndiqui jeē ní jito ró jéé névāha quití xéén un, suu cácuu rey jeē coto uhū de ñahan jíca jnéni un. Te sāha de jeē quendōo ndáhú ña te quendōo vichí líí ña. Te caji de cūñu ña te cahmu de ña nuū ñuhún. ¹⁷Chi Yaā Dios scānda ya ini de jeē na sāha de jniñu cúní yā. Te squíjnāhan de jnūhun jeē nacūaha de jniñu ndíso de nuū quítí xéén un, ndacu tī jniñu nde na squícu tāca jnúhun ni cahān Yaā Dios. ¹⁸Te ñahan jeē ní jito ró cúu máá ñuu teyí jéé cujéhnu nuū tāca rey ñayíví. Achí ndajéhé un.

Siquí jeē naa ñuu Babilonia

18 Yūcuán na te ni jito rí jeē ní cuun ñga ndajéhé yā ni quiji ichi ándiví. Te cújéhnu ndasí yá. Te jeē ndíndēe yá te ni ndíndēe núu ñayíví. ²Te ni cana jee ya:

Je ni naa ii ñuu teyí Babilonia. Te ni nduu vehe tāca táchi, nuū ñūhun ndínuū tachí neé, jíin tāca téji, quití quíni jeē tu núnjāhan ni yō. ³Chi ñuu un cúu nájnūhun ñin ñahan ndevāha, te ni sāha ña jeē ñayuu tācá nación, nájnūhun nájini i te cásiquí ndēe i Yaā Dios, cúu jeē ní castóo i ya te cásáha ndasí i cuēchi. Te tāca rey ñayíví, nájnūhun ni casíquí ndēe de jíin ñahan ún jeē

ní cajetáhú de jnūhun néé ní steén ña. Te ñayuu ní ñáyivi jéé cájeen cáxicó, ní cacucúca i jíin cuéhē jeneé jeē ní nevāha ña.

⁴Yūcuán na te ni jini sōho ri inga jnūhun jeē ni cáhān ichi ándiví:

Máá ró jeē cácuu ró ñáyuu maá rí, quendacoo ró ini ñuu jíñā, návāha ma quívi nduu rō jíin táca cuéchi jeē sáha ña, te návāha ma ndóho ró jnūndóho xeēn jeē ndoho ña.

⁵Chi ni cayā cuehē ndasí cuéchi ña, nájnūhun iin montón cáhnu ndasí jéé ní cusúcún ndé andiví. Te vijna te nduxeēn Yaā Dios siquī cuéchi ña. ⁶Stóho ró ña nájnūhun ni sáha ña jeē ní ndoho sava ga ñayuu. Te nachunaa rō nuū ña doble jnūndóho jeē ni jéhe ña nuū inga ñayuu. Te sáha ró jeē nandicó cóo doble siquī ña vēsú jeē ni sáha ña siquī inga ñayuu. ⁷Te yōhoyo ni satéyí ña máá ña, te cúca ndasí ní cotecu ña. Te suni jíin cúhva yúcuan nacuāha ró jéé ndóho xeēn ndasí ña. Chi jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuítí jnūndóho ndoho ri, achí ña.

⁸Jeē yúcuan cúu jeē iin quiví-ni te quíji cuehē jnūndóho siquī ña. Chi cuu ndīyí, te cucuíhyá ndasí ni ña, te coo jnamā, te cayú ña nuū ñuhún. Chi yōhoyo íyó poder maá Jítoho yō Yaā Dios, Yaā ní ndonda siquī cuéchi ña, áchí.

⁹Te tāca rey ñayivi jéé ní casíquí ndéé de jíin ña te ni cotecu cucá ndasí de jíin ña, ndahyū de te ndahyū cohó de coto de jeē cánda ñuhmā cayú ña. ¹⁰Te cuiñí jíca de chi yūhú de coto de jeē súcuan ndoho ña castigo. Te cahān de jíjnāhan de:

Nacā jeē xeēn ndóho ró, ñuu cujéhnu Babilonia, chi yá-ni ñuu teyí ní cuu ró núú. Te vijna chi iin núnúu-ni te ni quee castigo jeē náā rō, achi de jíjnāhan de.

¹¹Te tāca téé ñayivi jéé cájeen cáxicó ñuu ún, ndahyū de te ndahyū cohó de jehē. Chi tuá ndé iin cuaan ndajniñu cáxicó de. ¹²Te ndajniñu cáxicó de un cúu oro, plata, yuū luu jíin perla jeē ndeé yahu, jíin sahma fino jíin sahma seda jeē ndihí jíin jéé cuehé. Te suni táca yujnu jeē asīn jéen xicō, jíin táca ndajniñu luu jeē ni sáha jíin marfil jíin yujnu lúu jeē ndeé yahu jíin cáca cuaán jíin cáca hierro jíin yúu cuijín luu. ¹³Te suni cáxicó de canela jíin táca jíhyo asīn jíin súje cutú jíin súje uvuā jíin táca perfume jíin vino jíin aceite jíin harina fina jíin trigo. Te suni cáxicó de quití ndíso jíin lanchi jíin caballo jíin carreta, te nde ñayuu cáxicó de jeē sájniñu sáá-ni i. ¹⁴Te cahān de jíin ñuu ún:

Ni cujiyo ndíhi ndajniñu cúca jeē ní nujnahan ndasí ni rō. Te tāca jéé lúu jeē váha jeē ní cotecu cucá ró, chi ni naa ndíhi, te ma nánihin cuítí gā rō, achi de jíjnāhan de.

¹⁵Te tāca téé ni cajeen ni cáxico ní cacucúca jéé siquí ndajniñu ñuu ún, chi cuiñí jíca de jeē yūhú de coto de castigo coo ñuu ún. Te ndahyū de te ndahyū cohó de. ¹⁶Te cahān de jíjnāhan de:

Nacā jeē xeēn ndóho ñuu teyí yáha. Chi ni cuu nájnūhun iin ñahan jeē ni ñūhun sahma fino, sahma ndihí jíin jéé cuehé. Te ni ñuhun ña siquī oro jíin yúu luu jíin perla jeē ndeé yahu. ¹⁷Te vijna te

iin núnúu-ni te ni naa ndihi tācá ndajníñu váha ún, achi de jíjnáhan de.

Te cuiñi jíca táca tée cáscaca barco, jíin ñayuu cuángoo nuū barco, jíin tée cásájniñu ini barco, jíin táca gá tēe cásájniñu nuū mar. ¹⁸Chi coto de ñuhmā jeē cayú ñuu ún, te cana jee de jíjnáhan de:

¿Ndé íne ga ñuu teyí jéē cujéhu nájñuhun ni íyo ñuu yáha? achi de.

¹⁹Te cosō de ticachā ñuhun xinī de jeē cácuuíhyá ni de. Te ndahyū de te ndahyū cohó de. Te cana jee de jíjnáhan de:

Nacā jeē xeēn ndóho ñuu teyí yáha. Chi jíin ndajníñu cúca jeē ni íyo ñuu un ní cacucúca táca ñayuu cánevāha barco cájica nuū mar. Te vijna te iin núnúu-ni te ni naa ndihi-ni, achi de.

²⁰Te na cúsiñi ni tāca rōhó jéē cáyucú andiví, siquī jeē ní naa ñuu ún. Te na cúsiñi ni rohó, táca tēe apóstol, jíin tēe canacani jñuhun Yaā Dios, jíin ñayuu maá Yaā Dios. Chi ni sáha neé ñuu un síquī rō jíjnáhan ró, te jeē yúcuan ní ndonda Yaā Dios siquī, achi de.

²¹Yūcuán na te iin ndajéhé ndíso poder, ni quihin ya iin yuū cáhnu nájñuhun iin yōso cáhnu, te ni scāne ya ini mar. Te ni cahān yā:

Nájñuhun ni naa yōso yáha, suni súcuan naa Babilonia, ñuu cujéhu téyí. Te ma núcoo cuiti gā jeē cóto yó núu. ²²Te ni cahān yā jíin ñuu ún: Ini calle rō ma cúni sōho cuiti gā ñayuu jeē scáta i yaa arpa jíin flauta jíin trompeta. Te suni ma cóo cuiti gā ñayuu casáha tācá ndajníñu. Te suni ma cúni sōho ga i jeē nñhin tācá molino rō. ²³Te ni

iin lámpara ma sáha ga jeē cúndijin nuū rō. Te ni ma cúni sōho ga i vico jeē cácusīñi ni ñahan tēe nándāha mēhñu rō. Te ñayuu ní cajeen ni caxicó nuū rō, ni cacujéhu ndasí i ini ñayiví. Te ni stahú ró ñayuu tācá nación jíin jniñu tasí jíin jniñu mágica. Achí ndajéhé un.

²⁴Te ñuu un ní nihin castigo xeēn, chi siquī ñuu un ndéē cuēchi jeē ní jeti niñī tāca tēe ní canacani jñuhun Yaā Dios, jíin táca ñayuu maá yá, jíin táca gá ñayuu ní cajehni i nñí cáhnu ñayiví.

19 Te ná ni cuu tāca jéē yáha, te ni jini sōho ri jeē cahān jee cuēhē ndasí ñayuu ini andiví:

Yōhyo cújéhu Yaā Dios. Chi Yaā Dios maá yó cúu jeē ní jnama yóhó.

Te maá yá cujéhu ndasí, te maá yá jñí ndihi poder.

²Te ndaā te váha sándaā yā tācá jniñu,

chi ni ndonda ya siquī cuēchi ñuu neé cújéhu ún.

Chi ni stívi un ñayuu nñí cáhnu ñayiví jíin jñuhun cásiquí ndéē Yaā Dios.

Te ni sáha ya jeē ní ndutahū ñuu un síquī jeē ní jehni tāca mozo yā.

Achí i jíjnáhan i.

³Te ní cacahān tucu i:

Yōhyo cújéhu ya. Chi nñí cáni canda ñuhmā ñuu un jéē cayú, achí.

⁴Te ndihóco cuñi tēe jéhu cándiso jñíñu, jíin ndicúun jeē tēcu, ni cajecuiñi yití de, te ni cachiñúhún de Yaā Dios, Yaā néne nuū mesa ndácu jniñu. Te ni cacahān:

Amén. Súcuan na cóo. Yōhyo cújéhu ya.

⁵Te nde nuū mesa nuū ndácu ya jniñu ni cahān iin jnūhun:

Róhó jéé cájejniñu nuū Yaā Dios, jíin róhó jéé cándiso iyo nuū yā, jeé cácujeñnu jíin jéé tu cácujeñnu, na cáhān rō jeé yóhyo vāha Yaā cúu ya.

Achí.

Vico jeé nándāha Yaā cúu Londe

⁶Te ni jini sōho ri jeé cácahān ñayuu cuehē ndasí, te nñhin nájnūhun nñhin cuehē yūte, te nájnūhun jeé cahān nñhin taja. Te ni cacahān:

Yóhyo cújeñnu ya. Chi Jitoho yō Yaā Dios, Yaā jñí ndíhi poder, vijna te ndácu nñhin ya jniñu.

⁷Te na cúsiñ ni yō, te siñ ndasí na cóo ni yō, te na cáhān yō jeé yóhyo cújeñnu ya.

Chi ni quee quiví jeé nándāha máá Yaā cúu Londe.

Te je íyó túhva ñahan nandāha jíin yá, te suu cúu ñayuu maá Yaā Dios.

⁸Te ni nihin ña jnūhun cuhun ña sahma fino jeé ndóo ndasí te xíñú.

Achí i jíjnāhan i. Te sahma fino un cúu tācá jniñu ndaā jeé casáha ñayuu maá Yaā Dios.

⁹Te ni cahān ndajéhé yā jíin rí: Tee ró jnúhun yáha: Nacā jeé ndetū tāca ñayuu jeé ní cana ya quingoo vico nándāha Yaā cúu Londe.

Te ni cahān gā ndajéhé un jíin rí: Tāca jnúhun yáha cúu jnūhun ndaā ni cahān Yaā Dios, achí yá.

¹⁰Te ni jecuiñí yití rí nuū jehé ndajéhé un jéé chiñúhún rí yā nuú. Te ni cahān yā jíin rí:

Ma sáha ró súcuan. Chi ruhū suni mozo Yaā Dios cúu ri, nájnūhun máá ró jíin tāca hermano rō jeé cácañdije vāha jnūhun Jesús. Sa suhva nuū maá Yaā Dios chiñúhún ró. Achí yá.

Chi jnūhun siquī Jesús cúu jeé cácahān ndaā ñayuu cánacani jnūhun Yaā Dios.

Yaā yosó síquī caballo cuijín

¹¹Yūcuán na te ni jito ri jeé núne andiví. Te ni cane iin caballo cuijín, te Yaā yosó síquī tī naní yá Yaā ndaā, Yaā squícu, chi squícu ya jeé ni jéjnūhun ya. Te ndaā sándaā yā jniñu te ndaā ndóna ya siquī tāca jéneé. ¹²Te tinūu yá ndíndēe nájnūhun yáñuhūn. Te xiní yā ñūhun cuehē corona. Te yósó iin síhví yá jeé maá-ni ya cúu jeé jiní.

¹³Te ñūhun ya iin sahma jeé ni ñúndaji nuū niñí, te naní yá Jnūhun Yaā Dios. ¹⁴Te tācá ndajéhé yā jeé iyó andiví, cáyosō caballo cuijín, cándiquin yatā yā. Te cáñuhun sahma fino cuijín íyó ndoo. ¹⁵Te ini yuhu máá Yaā jeé yosó síquī caballo, quénda jeé cáca nájnūhun iin espada xeēn. Te espada un cúu jnūhun ya jeé stóho ya ñayuu tācá nación. Te nñhin ndacu ya jniñu nuū i. Te sándaā yā siquī cuéchi i nájnūhun jeé jeñú siquī ndehē uva cájexin. Te cuāha ya castigo xeēn ndoho i jeé quití ni yā siquī cuéchi i. Chi máá yá jñí ndíhi poder. ¹⁶Te sahma ya jíin síhin ya yosó jnúhun yáha: Rey nuū tāca rey jíin Jítoho nuū tāca jítoho, achí.

¹⁷Yūcuán na te ni jito ri iin ndajéhé yā jeé iin nuū níandii. Te ni cana jee ya xiní tācá quití ndáva nuū tachí:

Ndutútú ró quijicoo ró cuxíni ró ñin vico cáhnu sáha Yaā Dios. ¹⁸Te caji rō cūñu tāca rey jíin capitán jíin tée téyí, jíin cūñu tāca caballo jíin tée ni cayosō siquī tī. Te suni caji rō cūñu tāca gá ñayuu, cúu ñayuu casájniñu cuenta maá jíin mozo jeē ní cajeen ñayuu, cúu ñayuu cácujeñhu jíin ñayuu tu cácujeñhu. Achí ndajéhé yā.

¹⁹Yūcuán na te ni jito ri maá quiti xéén jíin táca rey ñayivi jíin cuéhē soldado de. Te ni candutútú de jeē cuajnáhan de jíin máa Yaā yosó caballo jíin táca ndajéhé yā. ²⁰Te ni jniñi ya quiti xéén cuahān tī preso jíin tée ni nacani jñūhun stáhú jeē ni sáha tāca jniñu jéñhu jeē ní jito jínūu quiti xéén. Chi jíin jniñu jéñhu un cúu jeē ni stáhú de tāca ñayuu jeē ní cajēhe jñūhun condiso jñunī quiti xéén, jíin jéē ní cachiñúhún imagen tī. Te quiti xéén un jíin tée ni nacani jñūhun stáhú un, cátecu ndindúu te ni scáne ya nuū laguna ñuhūn jeē cayú jíin azufre. ²¹Te jíin espada jeē cáne yuhu Yaā yosó caballo ni cajihī tāca soldado quiti xéén un. Te tāca quiti ndáva nuū tachí ni candutú chíji tī ni cayeji tī cūñu de jíjnáhan de.

Siquī mil cuiyā

20 Te ni jito ri jeē ní cuun ñin ndajéhé yā ichi ándiví. Te ndáhá yá ndacáa jeē núne tūhnchi cúnú ndasí. Te suni ndáhá yá ñin cadena cáhnu. ²Te ni jniñi ya maá cóo cáhnu jeē iyó ndé jenahán ndasí, te nání tī jexeén jíin Satanás. Te ni jihni yā jeē conuhni mil cuiyā. ³Te ni scáne ya ini tūhnchi cúnú ndasí. Te ni jesi váha ya, te ni

sácutú yá yuyáú, návāha ma stahú gá un ñayuu tāca nación, chi nde na jínu mil cuiyā. Te jeē yáha mil cuiyā ún, yūcuán na te cánuu jéē ndajī caca cuu jecu na tiempo.

⁴Te ni jito ri tāca mesa nuū ndácu jniñu, te yūcuan cáyūcu táca ñayuu jeē ní canihīn jniñu i sándaā i jniñu. Te suni ni jito ri anuá tāca ñayuu jeē ní cajehnde xinī i siquī jeē ní canacani i jñūhun Jesús jíin jñūhun Yaā Dios. Te tu ní cáchiñúhún i quiti xéén jíin imagen tī, ni tu ní cájēhe i jñūhun jeē cóndee jñunī tī jneē i chí ndaha i. Te ni jito ri jeē ní natecu i te ni candacu i jniñu jíin Cristo mil cuiyā. ⁵Yāha cúu ndīyí jeē nátecu xīhna gā. Te tāca gá ndīyí, tu ní cánatecu i, chi nde jeē jínu mil cuiyā. ⁶Te nacā jeē ndetū tāca ñayuu ndoo ánuá jeē nátecu xīhna gā. Chi ma cúu cuiti i vuelta uū. Te cuu i sutū nuū Yaā Dios jíin núu Cristo, te ndacu i jniñu jíin yá mil cuiyā.

⁷Te jeē jínu mil cuiyā ún, te ndajī Satanás te quenda nuū yíndihyū. ⁸Te stáhú tucu ñayuu tāca nación ní cáhnu ñayiví. Te stáhú ñayuu ñuu Gog jíin Magog. Te sáha jeē ndutútú táca soldado ñuu un jéē cuajnáhan de. Te coo cuéhē ndasí de nájñūhun ñití yumar. ⁹Te cuité núu de quingoo de níí cáhnu ñayiví. Te cuicó ndúu de ñuu nuū cáyūcu ñayuu maá Yaā Dios, ñuu jeē maní yā jíin. Te Yaā Dios chi scúun ya ñuhūn ichi ándiví, te cayū ndihí de. ¹⁰Te jexeén jeē ni stáhú táca ñayuu ún, chi scáne ya quihīn nuū laguna ñuhūn jeē cayú jíin azufre. Te yūcuán chí xīhna gā ni scáne ya quiti xéén jíin tée ni nacani jñūhun

stáhú. Te yūcuán ndoho nduú ñuú ní cáni cuiti.

Jeē sándaā yā jniñu nuū mesa cuijín

¹¹Yūcuán na te ni jito ri iin mesa cuijín cáhnu, te néne máá Yaā ndácu jniñu. Te ñayivi jíin andiví ni ndoñuhún cuáhān jeē ní jito ya nuū, chi tuá ni cúu quendōo nuū yā. ¹²Te ni jito ri tāca ndíyí, jeē ní cujéhnú jíin jéé tu ní cujéhnú, cáhiin nuū Yaā Dios. Te ni sáha ya jeē núne tāca libro, te suni ni nune inga libro jeē yosó síhví ñáyuu cotecu ní cáni. Te ni sándaā yā siquī tāca ndíyí ún, núu ndese jniñu ni casáha i jíin ndese yosó núu tāca libro un. ¹³Te tāca ndíyí jeē ní cajihí nuū mar, ni nanecoo. Te suni ni nanecoo tāca ndíyí jeē ní cajihí i, jeē íne i máá lugar nuū cáyūcu ánuá ndíyí. Te ni sándaā yā siquī, núu ndese ni casáha iin iin i. ¹⁴Yūcuán na te cuehyī jéhni ñáyuu jíin lugar nuū cáyūcu ánuá ndíyí, ni snáā yā ni scáne ya cuango nuū laguna ñuhūn. Te jeē ndóho ñáyuu nuū laguna ñuhūn, yūcuan cúu jeē cúu i vuelta uū. ¹⁵Te yūcuan ní scáne ya tāca ñáyuu ni casáha jniñu néé jéé tu yosó síhví i nuū libro jeē yosó síhví ñáyuu cotecu ní cáni.

Andiví jéé jíin ñáyivi jéé

21 Yūcuán na te ni jito ri andiví jéé jíin ñáyivi jéé. Chi andiví jíin ñáyivi xihna ñuhún ni naa. Te suni tuá mar. ²Te ruhū Juan, ni jito ri ñuu ii jeē cúu Jerusalén jeé. Te ñuu un ní cuun vēji ichi ándiví núu néne Yaā Dios. Te ñuu ún luu cáa nájñuhun iin ñahan jeē ni sátūhva ña ni cucutú

ña jeē nándāha ña jíin yii ña. ³Te ni jini sōho ri iin jñuhun jeē ni cáhān jee ichi ándiví:

Condēhé, chi vijna te ndéé Yaā Dios mēhñu ñáyuu. Te condee yā jíin i jíjnāhan i, te cuu i ñáyuu maá yá. Te máá yá condee yā jíin i jeē cúu ya Yaā Dios i. ⁴Te nacuaa yā ndute tñnúú i jíjnāhan i. Te ma cúu gā ñáyuu, ni ma ndahyú gā i, ni ma cucuíhyá gā ni i, ni ma jetú gā i. Chi je ni yāha tāca jnúndóho jeē ni íyo, áchí.

⁵Yūcuán na te ni cahān maá Yaā néne nuū mesa:

Condēhé, chi nasáha jeé rí tāca jéé iyó, áchí yá.

Te suni ni cahān yā:

Tee ró jnúhun yáha. Chi tāca jnúhun yáha cúu jñuhun jeē jiní ndije ró jéé ndaā cúu.

⁶Te ni cahān gā yā:

Je ni jinu. Máá rí cúu nájñuhun letra A xihna ñuhún jíin letra Z jeé sándihí na, chi máá rí ni squejéé ndihí te máá rí sínu. Te tāca ñáyuu cájichí, súcuan-ni cuāha ri coho i ndute cáne jeē cótecu i ní cáni.

⁷Tāca ñáyuu jeē cúndeyí síquī jéneé, nihin i ndihí jeé yáha cuu tahū i. Te cuu ri Yaā Dios i, te cuu i sēhe ri. ⁸Te tāca ñáyuu jeé cáyūhú ndoho siquī jnúhun ri, jíin ñáyuu tu cácandíje, jíin ñáyuu casáha jniñu néé, jíin ñáyuu cájehni ndíyí, jíin ñáyuu cájica jnéni, jíin ñáyuu casáha tásí, jíin ñáyuu cáchiñuhún ídolo, jíin tāca ñáyuu castáhú, ñáyuu ún chi quívicoo i laguna ñuhūn jeé cayú jíin azufre. Te yūcuan cúu jeē cúu i vuelta uū.

Jerusalén jeé

⁹Yūcuán na te ni quiji iin jnáhan ndihúxá ndajéhé jeé ní candāhá

ndihúxá cohō jeē ni nūhun chitú ndihúxá jnūdóho sandihí. Te ni cahān yā jíin rí:

Nehen, te na stéén rī nuū rō ñahan jeē nándāha ña cuu ña ñasihí Yaā cúu Londe, áchí yá.

¹⁰Te ni sáha ga Espíritu Santo jeē ní jito ndijin rī, te ndajéhé un ní jeca ya ruhū cuahān yā jíin rí xinī ñin yucu cáhnu súcún. Te ni steén yā nuū rī maá ñuu ñi cujéhnu jeē cúu Jerusalén, te ni cuun vēji nde andiví núu néne Yaā Dios. ¹¹Te ndíndéé ndasí ñuu un nájnūhun ndíndéé Yaā Dios. Te xíñū nájnūhun xíñū ñin yuū luu jeē ndeé yahu ndasí, nájnūhun yuū cuijín jeē quiyi nájnūhun vidrio. ¹²Te yuhu ñūu un ní jicó ndūu ñin jeē cáhnu súcún ndíhyú ñuu ún. Te íyó úxí uū yehyí. Te tāca yéhyí un ñin ñin ndajéhé yā. Te tāca yéhyí un yósó síhví ndihúxí uū yucūn Israel. ¹³Te lado nuū cáne niāndii iyó únī yehyí. Te lado norte suni íyó únī yehyí. Te lado sur suni íyó únī yehyí. Te lado nuū queé niāndii suni íyó únī yehyí. ¹⁴Te íyó úxí uū yuū náhnu jeē cúu cimientu maá jéē ndihyú ñuu ún. Te tāca yúu un yósó síhví ndihúxí uū apóstol maá Yaā cúu Londe.

¹⁵Te ndajéhé jeē ni cáhān jíin rí, ndáhá yá ñin yujnu oro jeē chícuaaha yá ñuu un jíin tāca yéhyí jíin maá jéē ndihyú ñuu ún. ¹⁶Te ñuu ún chi ñin cūhva-ni cúu ndicúún lado. Chi jeē cáni jíin jéē jité, ñnuú-ni cúu. Te ndajéhé un ní chicuāha yá ñuu un jíin yujnu ún. Te née uū mil uū ciento kilómetro jeē ñin ñin lado. Te ñnuú-ni cūhva jeē cáni, jeē súcún, jíin jéē jité. ¹⁷Te suni ni chicuāha yá maá jéē ndihyú ñuu ún, te née

unī xico cuūn metro jeē súcún. Te yūcuan cúu cūhva jejníñu ñayuu, jeē suni jéjníñu ndajéhé un.

¹⁸Te maá jéē ndihyú ñuu un ní cuvāha jíin yúu cuijín quiyi. Te ñuu ún chi maá nene oro cúu, te cáa nájnūhun vidrio quiyi. ¹⁹Te tāca yúu jeē cúu cimientu maá jéē ndihyú ñuu ún, ní cucutú jíin ndínuū yuū luu jeē ndeé yahu. Yuū ñin cúu yuū cuijín quiyi. Te jeē uú cúu yuū ndeé ndí. Te jeē uní cúu yuū pinto. Te jeē cuún cúu yuū cuí ndí. ²⁰Te jeē uhún cúu yuū pinto jeē ñūhun raya. Te jeē ñūu cúu yuū cuehé pinto. Te jeē uxá cúu yuū cuaán quiyi. Te jeē uná cúu yuū cuí ndeé. Te jeē ñin cúu yuū cuaán ndí. Te jeē uxí cúu yuū cuí cuijín. Te jeē uxí ñin cúu yuū cuehé cuaán. Te jeē uxí uū cúu yuū ndihí ndí. ²¹Te ndihúxí uū yehyí un cácuu uxí uū perla jeē ndeé yahu. Te ñin ñin yéhyí cúu ñin ñin perla. Te maá nene oro cúu calle cáhnu ñuu ún, te quiyi nájnūhun vidrio.

²²Te tú na templo ni jíto ri ini ñuu ún, chi ní cáhnu ñuu un ndeé maá Jítoho yō, Yaā jñí ndihí poder, jíin Yaā cúu Londe. ²³Te ñuu ún tu jíni ñūhún cundijin jíin luz niāndii jíin yōō. Chi jeē ndíndéé maá Yaā Dios cúu jeē cundijin ñuu ún. Te luz ñuu un cúu maá Yaā cúu Londe. ²⁴Te ñayuu tāca nación ñayiví jéē ní jnama ya, caca i jeē cundijin luz ñuu un núu i. Te tāca rey ñayiví quijicoo de ñuu ún, quindeca de tāca ndajñíñu jeē ndeé yahu jíin jéē cujéhnu de sáha. ²⁵Te tāca yéhyí ñuu ún ma cóndihyū cuítí nduú, chi tú na jecuāa coo. ²⁶Te ini ñuu ún quijicoo ñayuu tāca nación,

quindeca i tãcã ndajníñu jeē ndeé yahu jíin jéé cujéhnú i sáha. ²⁷Te ma quívicoo cuiti ni ñin jeē jnehén. Ni ma quívicoo ñayuu casáha jniñu néé jíin jéé castáhú. Chi quívicoo máni máá ñayuu jeē yosó síhví i nuú libro jeē yosó síhví ñayuu cotecu níí cáni, jeē névãha Yaã cúu Londe.

22 Yücuán na te ndajéhé yã ni steén yã nuú rí ñin yüte íyó ndoo. Te ndute un sáha jeē cótecu yō níí cáni. Te xíñú nájnūhun vidrio, te cáne nuú mesa nuú ndácu Yaã Dios jniñu jíin Yaã cúu Londe. ²Te jícã yüte ún sava mēññu calle cáhnu ñuu ún. Te ndíndúú lado yuyüte un yíhi yujnu jeē cótecu yō níí cáni sáha. Te yujnu un jéhe ndehē uxí uú jínu jeē ñin cuiyã, chi tãca yóō cúun ndehē. Te ndaha yúcu i cúu tajná jeē ndúvãha ñayuu tãcã nación. ³Te tãcã-ni jeē ni cahãn yã jeē násūu jeē váha cúu, ma cóo ini ñuu ún. Te ini ñuu ún cuiñi máá mesa nuú ndácu Yaã Dios jniñu jíin Yaã cúu Londe. Te ñayuu cáccandije jeē cácuu i mozo yã, chiñúhún i ya. ⁴Te coto i nuú yã, te condee síhví yá jneē i. ⁵Te ma cóo ga jecuáã ñuu ún. Te ñayuu cáyücu yúcuan tuá jíni ñúhún i jeē cúndijin lámpara nuú i, ni jeē cúndijin niãndii. Chi jeē ndíndēe máá Jítoho yō Yaã Dios cúu jeē cúndijin nuú i. Te ndacu i jniñu níí cáni cuiti.

Jeē cuácuyajni ndiji Cristo

⁶Yücuán na te ni cahãn ndajéhé un jíin rí:

Tãca jnúhun yáha cúu jnúhun jeē jini ndije ró jéé ndaã cúu. Te Jítoho yō Yaã Dios, máá yá sáha jíin tée

cánacani jnúhun ya jeē jíin Espíritu yã cánacani de. Te suu máá yá ni tají yá ndajéhé yã návãha steén nuú ñayuu cácuu mozo yã tãcã jniñu jeē yachí coo.

⁷Ndiji yachí rí, achí yá.

Te nacã jeē ndetü ñayuu chusóhó jnúhun Yaã Dios jeē yosó núu tútu yáha.

⁸Te ruhū Juan, ni jini sōho ri tãca jnúhun yáha, te ni jito ri tãcã jniñu yáha. Te ná ni jini sōho ri ni jito ri, yücuán na te ni jecuiñi yítí rí nuú jehé maá ndajéhé jeē ni steén tãcã jniñu yáha núu rí, jeē chiñúhún rí yã nuú. ⁹Te ni cahãn ndajéhé un jíin rí:

Ma sáha ró súcuan. Chi ruhū suni mozo Yaã Dios cúu ri, nájnūhun máá ró jíin tãca hermano rō jeē cánacani jnúhun ya, jíin ndíhi ñayuu cájetáhú jnúhun yósó nuú tútu yáha. Sa suhva nuú maá Yaã Dios chiñúhún ró. Achí yá.

¹⁰Te ni cahãn gã ndajéhé un jíin rí:

Ma chísaahi ró tãca jnúhun Yaã Dios jeē yosó núu tútu yáha, chi je cuacuyajni tiempo jeē cúndaã ndíhi. ¹¹Te ñayuu casáha jniñu néé, na sáha ga máá i jniñu néé. Te ñayuu jnehén ánuá, na quéndōo máá i súcuan. Te sa ñayuu casáha jniñu ndaã, na sáha ga i jniñu ndaã. Te ñayuu cáhiyo ndoo ánuá, na cáca ndoo ga i súcuan. Achí ndajéhé un.

¹²Jendaá jeē ndiji yachí rí, achí Jesús. Te quiji ri jíin táhū cuãha ri nuú ñin ñin ñayuu, núu ndese jniñu ni casáha i. ¹³Máá rí cúu nájnūhun letra A xihna ñúhún jíin letra Z jeē sándíhí na, chi íyó rí nde xihna ñúhún te coo ri níí cáni.

¹⁴Nacā jeē ndetū ñayuu jeē jéhe i jnūhun ndundoo ánuá i nájnūhun ndúndoo sahma. Chi cuu caji i ndehē yujnu jeē sáha jeē cótecu i níí cáni, te cuu quívicoo i yéhyí ñuu ií ún. ¹⁵Te ichi fuera ñuu ún cuiñi ñayuu tu cácanđíje, jíin ñayuu casáha tásí, jíin ñayuu cájica jnéni, jíin ñayuu cájehni ndīyi, jíin ñayuu cáchiñúhún ídolo, jíin ñayuu cácusíi ni stahú jnáhan.

¹⁶Máá rúhū Jesús, ni tají rí ndajéhe rí návāha castūhun yá tāca jnúhun yáha nuū tāca grupo ñayuu cácanđíje. Te máá rí ni sáha jeē ni íyo rey David, te ni quiji ri nuū yucún David. Te cúu ri nájnūhun lucero ndíndēe cáne cúndijin. Achí yá.

¹⁷Te máá Espíritu Santo jíin máá ñahan jeē nándāha jíin Yaā cúu Londe, cácahān:

Nehen, quívicoo ró ndaha ya, achí.

Te tāca ñayuu jeē jíni sōho, suni na cáhān i:

Nehen, quívicoo ró ndaha ya.

Te tāca ñayuu cájichí jeē cáconi i coho i, na quívicoo i ndaha ya, te súcuan-ni na cóho i ndute jeē cótecu i níí cáni sáha.

¹⁸Te tāca ñayuu jíni sōho jnūhun Yaā Dios jeē yosó núu tútu yáha, cáhān níhin ri jíin i: Núu ndé ñayuu chisóo i nuū jnúhun cáhān tutu yáha, te Yaā Dios chisóo yá jnúndóho cáhān tutu yáha, ndoho i. ¹⁹Te núu ndé ñayuu quende i jecu jnūhun cáhān tutu yáha, te Yaā Dios quende yā tahū i jeē yosó núu libro jeē yosó síhví ñayuu cotecu níí cáni, te ma níhín i tahū i ini ñuu ií ún. Te tutu yáha cúu jeē cahán síquī tācá un.

²⁰Te Yaā jeē ni cáhān tāca jnúhun yáha, suhva cáhān yā:

Jendaá jeē ndíji yachí rí, achí yá.

Amén. Súcuan na cóo. Jítoho ná Jesús, jícán tahū na jéē ndíji yachí ní.

²¹Te ñúhun ni rí jeē Jítoho yō Jesucristo na sáha ga yā jeē váha róhó jíjnāhan ró. Amén.